

兩浙輶軒續錄

兩浙輶軒續錄卷十五目

姚孟石 祝懋裳 沈品蓮 唐 祝 吳文照

曹三選 錢嗣容 何綸錦 徐夢熊 胡 卿

朱文治 宋世舉 王子宣 何 豫 裴瑞興

趙蕙芬 洪 福 張中發 沈 舫 許士杰

王啟焜 朱星煒 鮑廷博 鄭遵信 林 綱

陸成棟 呂 燿 辛天植 余本然 錢 楷

張 炳 姚 杰 陳 泖 張 煥 邵希曾

薛 梓 許嘉猷 程文淦 朱廣川 曹應毅

屠本仁 盛植才 陳元枚 李 灃 秋學禮

鍾 山 谷廷桂 查 鋌 沈方約 朱文藻

李 昇 孫 姓 吳克諧 孫凝忠 桂浩然

許傳瓌 徐士敷 林文朗 吳錦 李泉

胡昌基 吳振麟 孫蔚 盛本 鄧嗣宗

吳啟焯 盧標 王維孫 吳鴻飛 王惟球

魏精 陳桂生 李錫齡 沈文鏡 鄭增

金友白 吳應和 朱履中 施玉麟 趙文炤

楊國柱 吳林

兩浙輶軒續錄卷十五

督學使者潘衍桐訂

姚夢石

字又芝錢塘人乾隆戊申舉人官徽州府訓導

上水謠

農丈人天上坐赤腳翻日車翻得銀河腳底墮車隆隆入河
中河中之泥多於水丈人心血亦如此今日且過明日奈何
莫羨河魚食見魚不見麥以身代麥魚豈惜願子壽考以肥

澤

祝懋裳

字蓉清海甯人乾隆戊申舉人官樂清教諭著蓉清詩

錢泰吉曰蓉清先生與先子為莫逆交先子幸大興時
先生嘗佐閱縣試文暇輒飲酒談諧泰吉時嬉戲於旁
今已四十餘年猶能記憶一二也道光十四年從兄儀
吉與先生之孫悟生遇於廣州於行篋中傳鈔先子與
蓉清丈札泰吉得錄入頤和室合稿中悟生久客未歸
茲纂備志欲問遺事不可得詩稿亦未得見謹誌以待

續纂

杭郡詩三輯蓉渚秉性剛正客京邸十五年未嘗一登
要津之門司鐸東甌以實學勵士當時至此之胡安定
其制行
可知

四十初度同人招飲紫藤花下分韻得之字意有未盡

足成四章 錄二

春風無私拂大地無私滋紛紛豔陽景桃李暹妍姿中庭一
老樹維藤屢絡之縱有著花日已恨多醜枝人生無美楯所
貴在及時飛騰期暮景空結徂年思

三年客京都素衣嚙不滓飛雲思返岑倦鳥欣棲枳無田甯
不歸坐待秋風起秋風亦何憾失此素心士撒手與搏沙聚
散皆偶耳記取爪痕留一樹藤花紫

沈品蓮 字根玉嘉興人乾隆戊申舉人

校官詩錄秋塘幼時以詩文呈錢文端公曰他日必
有文名在括蒼修廢舉墜俸錢不足家取給之歸時有

牽衣泣
別者

夏日獨坐

光風約略似蓬壺長日如年一事無秦順何妨裁柳簡焦先
猶自詡瓜廬未談鵝被先憎熱欲乞羊書恐斷屠妙手翦花
思術士吹生不異異噓枯

唐

祝

字蔗圃秀水人乾隆戊申舉人著煮花軒詩鈔

府志祝嘗主講上海書院誘掖獎勸人才蔚起著有周易實義六卷

家居懷同遊諸子

寂坐鄉園思舊遊關山何處足句留雪郊驅馬寒侵骨風岸
揚帆浪潑舟眼底江淮村店路夢中燕趙酒家樓天涯知己
多寥落彈鋏歸來又一秋

吳文照

原名煥字香竺石門人乾隆戊申舉人官廣東惠州同知著在山草堂詩集

兩浙輶軒續錄 卷十五

以道居步多推

工

子方川

府志文照由教習任新興令愛民如子凡有益事輒舉
之時苦鹽運有議開天堂等處地方瀦水以轉運民大
不便文照力請罷之場塘村為新興要地積匪拒捕傷
役巡撫命帶兵圍之文照以煙戶數千會營必至玉石
俱焚單騎往解果擒其魁全免甚眾移香山以
獲盜功擢知州任惠州同知生平工詩善畫
冷廬雜識吳香竺大令嗜吟咏有句云一官如獨客
萬事付閒吟嘗賦移居秀州傾脂河詩人咸稱誦之

祝貞女詩

幽蘭空谷香孤松澗底翠淑女抱貞操了然通大義女未字
義從父女既字義從夫夫死不再生嗟嗟尚有姑僉曰荼苦
我甘如齋僉曰冰寒我飲如醴祥女入門惟家之慶不見所
天血與淚迸脫我繡羅襦毀我黃金釧破我飛鸞鏡彈我寡
鵲絃事死兼事生辛勤此十指寸心耿不寐地下報夫子朝
進羹湯喜姑在堂暮進羹湯奠姑靈牀再拜哭姑靈妾命今
夕畢匪妾命遽畢代夫溫清事已卒盤盤鴛鴦帶不作續命

絲皎皎明月光只照女貞枝

源津渡

十里源津渡平沙兩岸黃牛鳴催日落鶴立比人長古塔奇
難畫山花凍不香扁舟何處繫烟水自茫茫

女史唐素花卉卷

女史江蘇人工繪事母
亡矢志不嫁賣畫養父

母亡父無偶女在父有子晨昏甘旨謀艱難此十指身如冬
嶺松孤標只自矢心如秋籬花無意鬪紅紫

東塔寺番僧頂骨歌

嚮身成佛尸毘王血肉飽充鷹虎腸後人妄冀餘靈乞花萼
樓前迎死佛人死無靈骨有情爲酬知己願殘身堅牢壽相
歲三百頂骨未朽刀瘢新佛面團團如滿月月到滿時亦應
闕佛髻熒熒現寶珠報德不與靈蛇殊輕車裝載歸鄉里三

千眾皆大歡喜香水朝澄蓮葉龕精芒夜吐舍利子東塔寺
前塔尚存客來摩頂禮禪門卿用卿法何太苦吾戴吾頭不
敢捫君不見腹可剖古忠直頸可刎情膠漆義重生輕今昔
一惜哉不如虎顛骨能攪伏龍出龍窟

曹三選

字涓之號扶谷桐鄉人乾隆戊申舉人官直隸懷柔知縣著次雲閣詩

緝雅堂詩話扶谷宦游南北以事左遷羈迹蠻徼詩格逾老有句云無家客滄海將劍倚空桐甚有筆力

二忠墓

繁人侯剛章明俱不屈王莽而死其合葬處俗名大墓山

何緣二節士地下此同歸死識周官誤生憐漢臘非靈風雙
劍合積日一戈揮元白嘲難解輸他墓草肥

綏靖屯雜書所見

五丁奇闢點蠻煙山勢崔嵬地軸偏小摘野蔬須過夏多收
桐乳卽逢年千秋雪下成頑石百尺峯迴瀉湫淵纔隔成都

三十舍便疑別有洞中天

最喜官閒不費才登臨隨處坐荒苔長裙蠻女鬻薪去偏袒
胡僧乞酒來但怕風多簾不捲每逢春去藥親栽近時少解
鉤輞語欲賦取隅恰自猜

錢嗣容

字思白象山人
乾隆戊申舉人

縣志嗣容家貧館穀所入日不給篝燈夜讀不稍
懈留都門數載諸名卿爭器重之掌教櫻溪書院

石屋八景和家梅溪韻

霏霏薜蔔香隱隱高峯側颼颼白雲家深深梵王國乍雨疑

乍晴即空悟即色

雨香庵

萬籟寂無聲蕭蕭鳴不已景忽自情生感亦因心起起坐時

靜聽涼月明荒圯

聽秋室

平石列如牀深林布若幄漫漫多白雲山靜午不覺呼之寂

兩折階軒讀綠

卷十五

曹三選錢嗣容

四

無人芳草自綠縵眠雲

山人愛養鶴結茆西山凹曉來放之去暮來還相招下視滄

海闊一峯凌清霄招鶴

我心若止水止水清徹底誰使濁自淆對此不一洗靜坐池

上觀心鏡覺瀾瀾洗心

人心欲上天恆苦乏佳遇勿自阻臨崖絕處必得路粼粼一

片石側側相予顧指迷

花開滿山谷花落隨水行古今一瞬息何苦營虛聲吾自樂

吾樂動靜毋嬰情流華

蓬島在瀛海何必求其真高山與流水無意寫斯神一曲水

仙操吾師方子春移情

何綸錦字子襄山陰人河南籍乾隆戊申舉人
改歸本籍官金華訓導著巢雲閣詩鈔

嚴榮序略子襄幼產禹穴長游龍門輕華不居雄秀獨
出詠古諸體以奔軼之才得變化之法出入萬怪力追

一真

古風十七首 錄十三

香餌綬直鉤不能得一魚豨膏滑方輪不能運吾車鉤亦可
使曲輪亦可使圓漢陰有愚夫抱甕灌其田
欲白雪亦黑欲黑漆亦白黑白在人心不係漆與雪情意一
綢繆枯朽生光澤恩愛兩乖離毛施無顏色

北里有佳人十年貞不字東鄰有醜女妖冶媚夫壻菅蒯且
見收絲麻豈終棄所嗟賢雄難良媒亦匪易

蟻垤無丈材蹠涔無尺鯉短枝鸞不棲拳石雲不起焉有浮
薄姿能任重遠理所以古達人端自立身始

曲鍼不可縫何不垂絲緝直鉤不可釣何不刺繡紋將欲直

其鍼螻屈不願伸將欲曲其鉤龍矯難爲馴才不適世用性
獨全天眞君子愛故我敝帚還自珍

斗柄不可挹匏瓜不可食挂名天上星磊如山中石山石資
人用眾星徒歷歷農事在耕耘女事在紡織當位而尸居空
名復何益

蝸角蠻觸爭腐鼠青蠅賀高飛雞舞饗遠遊蟻旋磨結習拘
於墟萬古莫能破局促井底鼃語以海水大遂令聞者驚毋
乃告者過鳳凰鳴朝陽燕雀豈能和

皇天若雨粟舉世皆游民皇天若雨金舉世皆貪人無金勵
其廉無粟勵其勤廉者終不匱勤者終不貧奈何惰四體而
求快一身君子所無逸仰答天心仁

畜驥如畜狗驥亦作狗走養鶴如養雞鶴亦作雞棲食少力

已衰况更羈絏之非無千里志局促安所施遇以庸人目責以國士知棄置勿復道沈憂令人老

松柏抱本性歲寒安所期願隨桃李花照姬春陽時萬彙遂長養不受冰霜摧孤秀氣亦慘眾榮心自怡混迹凡卉中何論知不知

富人無凶年貧人無樂歲富人嗔穀賤貧人嗔穀貴斗米值千錢不滿富人意斗米值百錢已爲貧人累人心自不平遺憾及天地

適越資章甫越人無所施抱璞獻楚庭楚王不見知所挾旣已誤所投亦已非客從海上來遺我珊瑚枝燒之不中薪炊之不成糜再拜謝海客何以療我飢棄置東海珍采掇西山

薇

文章乃元氣土習其本根國運關盛衰民風驗澆淳苟同固足恥矯異亦失真奈何丹黃業而爲青紫津會當藏名山不則傳其人誰與挽積波手扶大雅輪

捕蝗謠

介蟲敗穀世有之防之不早捕已遲但見羣飛蔽空下安識萌蠶由地滋誅誅育子動盈百跳躍經旬傳雙翼乘昇炎火古有經始不撲除繼無及東邨西舍奔走忙喧傳縣吏來捕蝗殺雞置酒款縣吏醉飽之後翻披猖驅民入野供役使踏徧田頭及田尾蝗蠶未除十二三蝗食餘禾盡踐死蝗驚起向他處飛縣吏怒逐如合圍田中父老眼流血敬告縣吏牽吏衣天災未可人力勝願勿捕蝗聽民命縣吏怒詈豎目嗔何物敢違縣官令父老殷勤重致詞爲君釀錢作酒資家科

戶斂入囊橐按籍徵收無一遺縣吏笑入城中去父老回看
捕蝗處仰天太息不忍歸又見飛蝗下如雨

弦歌書院感懷

宛邱城南行迹稀弦歌臺上落葉飛歲月迫人去復去風塵
逐客歸未歸關山萬里牛馬走冰雪一天鸞鳳飢聖賢自古
有尼地虎兕莫悲吾道非

徐夢熊

號漁莊山陰人乾隆戊申舉人大挑知縣著玉屏山莊詩鈔初續集各一卷

余大輝序略先生所作詩好深湛之思意有所屬于鍾百鍊語必驚人集中所載諸作言情則纏綿排側至性動人詠物則激滌萬狀牢籠百態論古則獨具卓識不襲陳言清新雅健各體皆備是編出必能傳世行遠無疑也

高驥雲序略先生詩不為其逸愛好天然蓋性情所寄不可強也年近八十容顏返赤華髮被兩耳有客則煮茗談詩終日不倦少時讀五車書隨所點筆無遺忘錯互真偉人哉

雨夜懷南歸諸子

離居才幾時歲華忽云暮
念余客京師緇塵久化素
賴有賞心人少得此中趣
同調苦無多二三約堪數
猗猗入室蘭皎皎當庭樹
一朝賦歸田掉頭不我顧
西風吹雨來三日霏如霧
階下屐痕深門前車轍互
感此起長歎良夜杳難度
夢回青燈影夢去滄江路
空聽對牀聲峭帆在何處

正月八日赴黎平郡

層樓高接斷霞邊鐵塞銅關氣鬱然
晴日半消千嶂雪暖風輕颺一溪煙
原頭土黑初經劫嶺上松青不計年
屈指宦遊剛八載又催客思到花前

安湖紅葉

安湖一名木枝湖

不愛花枝愛木枝安湖秋景勝
春時霜融渤澥珊瑚網霞泛

蓬萊琥珀卮樵客拾薪燃火齊美人臨鏡妬胭脂何如鼓棹
煙波裏添箇紅衣老釣師

次韻陶雲汀中丞海運登礮臺二首

天南一柱障層瀾碧波平縱大觀鼇背三山飛渡易龍驤
萬斛負舟難膠萊地脈從頭問析木星垣仰面看共喜重臣
能作楫不教珠粒貴長安

屈宋衙官逐隊從環觀吉祀頌雍容谷王效順誠先格川后
來朝職遠供波底魚龍聽史祝洲中麟鳳認仙宗臣心匪懈
邀天鑒不獨明禋矢恪恭

董村同沈香巖蒲參朱雲巖竹林韓鐵笙孝廉觀劇夜

飲陳氏山堂

悵望龍宮鎖寂寥前村絲竹忽相邀旗亭豔影翻歌扇樂府

新聲咽玉簫殘月曉風楊柳岸行雲流水木蘭橈到家重續
臨川夢枕畔餘音尙未銷

回首金闈七里塘紅燈綠酒白公堂三更屢顧吳孃曲一面
頻迴刺史腸天上羽衣容易散人閒絲管最難忘諸君莫笑
顛狂甚故里聞歌勝異鄉

胡卿字次公號習亭山陰人寄籍河南乾隆戊申舉人官山東臨邑知縣著煮茶亭學吟東遊草

邵乘華序略習亭性耽吟咏早歲詩名噪江淮閒迨試宰山左補官臨邑有蕭然自遠之致為詩獨抒性靈不事摹擬

手插柳枝已棲鴉矣感而有作

真覺年華逐逝波手栽楊柳拂嵯峨樹猶如此愁何極髮不
饒人白漸多豈有風流同婀娜不勝憔悴亦婆婆棲鴉似解
羈人恨作意啞啞對寤歌

平定道中寄進也家兄

東風習習柳絲絲又是征衫上路時
有限年華常作客無多骨肉倍傷離
蒼茫落日人行少雜沓荒山馬度遲
唯有夢魂難阻隔池塘夜雨艸初滋

題夢香御風圖

天宇何寥寥天風何浪浪中有一人御風行
乃是維揚姚夢香東西南北風無常君今御風之何方
得無覩此川秦楚豫之民心惻傷將欲痛哭上懇天帝旁
又聞三神山乃在海中央黃金爲闕白玉爲堂食巨棗兮飲瓊漿
將欲往尋安期羨門之徒相與徵逐而翱翔天門九重不可叩
神仙之說終渺茫歸來兮歸來二十四橋明月夜玉人吹簫聲
悠揚蕃釐觀中春風長瓊花一朵嬌無雙右手執壺左持觴
爛醉不管雙

丸忙他鄉雖云樂不如還故鄉

朱文治

字詩南號少僊餘姚人乾隆戊申舉人官海

張駿官蹟碑略公在州十八年學中事悉創新之多識
量敦氣誼揚善誠過自奉如寒素謂儒者立身莫先乎
儉謀生在武節性防淫亦在此乙丑傷人餓中丞阮公委監
糴於硤石戊辰鄉試阮公監丁卯傷人事詢公公乃上

條約五杭郡濬上河公陳水利七條
當事皆臆之將以卓異薦引疾歸

張問陶序略少僊以詩屬序子謂眼前真境即吾少僊
雲明月欲動少僊以詩屬序子謂眼前真境即吾少僊

詩境也

張青選序略少僊愛竹所居在姚江之東郭種竹萬竿
浮綠滿天吟哦其間晏如也少僊失侍撫于其姑及
長事如所生家雖貧甘旨無缺又嘗為陳樹齋軍門客
軍門以吳淞獲盜案將遣戍少僊時館京師單車南下
為經紀其事其血
性過人大率類此
梅曾亮序略少僊文行交美有名于時以大挑得知縣
顧棄不取為州學官復辭官而家居其詩夷猶容與淡
泊而自適

邊浴禮跋略或題茶山集云清于月出初三
夜淡似湯烹第一泉移贈茲集可無媿色

撲滿

四座請勿譁聽我談撲滿古來蓄錢具狀同抱朴梳色黝土
合圍質堅刀鑿窾但投涓水錢誰掌北門管甕請入周興璧
不運陶侃匿影見晶瑩鏗聲聞續斷密等詩貯筒深于飯在
簪鳧血塗幾層鵝眼落無算鄙夫猶硜硜錢神獨懣懣泉湧
流不通布展尺何短未築黃金臺空圍錢帛館能入貴能出
性急勝性緩鎮日莫摩挲一擊推勇悍忽作冰炭腸初破天
地卵長倩贈非遲和嶠癖乃散客去自捫心夢到西江浣

定海夏孝女詩

乾隆乙巳年事
廕山爲余述之

縣官不貪父不死誰雪父讐恨無子十八女兒被髮號百千
男子捫心恥女生猶未嫁父尸橫在牀官來驗尸吏走忙女

手霍霍揮刀光縣官戴頭怕頭落女卻生心便生腳渡海乘
 潮出甬東甬江水與錢江通官官相護亦如水擊徧官鼓官
 耳聾官耳聾女心苦南掩轅門北投部掉頭顧影向北行酷
 吏不除天大暑暑氣橫塞西陵船女病不起長呼天都門天
 隔數千里父忽見女來重泉吁嗟乎父讐無時復女死難瞑
 目厲鬼何能陳案牘人傳此事常歌哭歌者懷孝女哭者向
 縣官縣官雉經死孝女墳未乾恢恢天網天不寬大吏聞之
 心膽寒

陶篁邨詩冢歌

篁邨先生老詩伯半生自占煙波宅篁邨伯鷗莊在西湖一杯新築生
 壙成更展墳前地三尺三尺之冢何時開詩人未埋詩先埋
 殘膏賸馥知多少鏡水稽山互回抱眼看明年春草青桐棺

難沒真性靈但恐奚囊忽傳出
髑髏滿野思搖筆幾人嘔出
心血來生前得句成死灰幾人作詩
詩有骨光照重泉氣蓬
勃白楊樹下風蕭蕭等身著作如牛腰閒田誰買橐誰瘞空
對青燐悲寂寥先生顧之啞然笑此詩今生可修到勝他一
卷殉蘭亭魂魄何能譜同調惟我與我堪爲鄰紙錢不挂長
留春儻援賈島祭詩例僕也甘爲配享人

西洋表

古來測景立圭表冬推黃道夏赤道法參鳳瑄工調陽用異
雞人司唱卯西洋雕琢近益精古月團樂製何巧渾天儀見
具體微句股算神專語小暗羅列宿撐腹腸分擘覆孟憑指
爪一蟻空盤九曲珠六鼈輕負三神島轉輪祕鑰失分毫香
篆蓮壺各顛倒迺知萬竅引一鍼不用滿腔裝七寶纏腰客

喜鬪新奇到眼時眞稱大好偶懸綸閣促趨朝攜入詞壇催
脫稿細字排成一覽知寸陰擲去重來少百年消息得幾何
滴瀝聲中逼人老

海塘鐵牛歌

吾聞鐵稟陽氣牛屬陰義取坤土生元金又聞黃牛渚邊蛟
患絕蛟性由來畏生鐵海塘鐵牛何來思牧人不牧誰麾之
鑄成昉自李少保衛各識雍正乾隆時秋風吹海秋潮勁牛
耳不聰鼻能聽秋潮落後秋月明牛老從不聞喘聲爾牛所
司獨何事鐵骨錚錚心無二駕犁直欲耕桑田海若有威何
敢肆吁嗟乎安瀾永慶牛有功十五頭鎮塘西東笑彼石牛
一見如旱魃木牛轉餉憑神工何如鐵牛滿身勒銘識鄭家
識字將毋同

治平以三十自述詩寄闕作此代柬

瞥見垂髫後頭銜一品官昔年勤問字此日獨登壇位到公
侯易心知稼穡難丈夫須立志麟閣畫圖看

到京後平泉庶常招同人集陶然亭題壁

黃葉飄零滿壁塵重尋詩境最傷神空亭早得新秋氣入座
無多舊酒人一醉肯忘今日事斜陽愁照百年身神仙富貴
都難必我願長爲太古民

書船山紀年詩後

滿紙飛騰墨彩新誰知作者性情真尋常字亦饒生氣忠孝
詩難索解人一代風騷存寄託十分沈實見精神近流派別
紛紛甚那及東川老史臣

潤州旅次

兩浙輶軒續錄

卷十五

朱文治

三

八

何處獨招涼江樓倚夕陽一聲秋在樹千里客思鄉小病詩
猶健多愁酒自香西風莫吹急新雁未成行

宋世榮

字直勛號礪山臨海人乾隆戊申舉人官陝西扶風知縣著紅杏軒詩鈔

洪增曰先叔祖雪蘊老人與先生交最深有句云詩成自苦無人問只有城西宋礪山張船山太史多呵神罵鬼之作集中諸遊仙詩與之同一玩世先生自悟為邑南白巖寺僧集中往往及之生平撰述甚富有周禮故事書疏證儀禮古今文疏證礪山駢體文古銅爵書屋金石文凡十餘種嘗刊鄉先進著作為台州叢書僅成甲乙兩集而歿

書說文長箋後

叔重真大儒作書辨建首刮篋俗學祛貫珠經義剖說文十
四篇精嚴綜斯籀後人漸失傳絕學榛蕪久偏旁混賑觝開
闔昧非耶但聞豕渡河誰見魚貫柳流及明季年燭滅長夜
黝凡夫本庸才鹽媠忘其醜無佛冒稱尊獨銜千金帚長箋

災棗梨四海不脛走小儒驚咋舌名流笑開口蘭蕙雜蓬蒿
瓦礫迷鐘卣文豹皮蒙驢豐貂尾續狗體例本支離引據尤
雜糅我適過閭門寒山縮培塿山人索價虛故居寒風吼今
日讀其書真合覆盆甌太息揮毫時孤負如賓偶名士畫餅
耳死不如速朽

伯牛祠

百蟲將軍本伯益杜拾遺廟飾女流舊聞小說髮爲指伯牛
廟乃塑白牛生前旣譌駢角父死後又蒙犧牢羞徒資委巷
詫牛鬼斯人命矣實不猶我馬旣瘖行斃斃日暮裁過東平
州王瓜園北數椽耳古樹斜陽憶道周鉅碑深刻六大字年
年醴幣修春秋我記兩次拜祠下鐸聲鞭影空悠悠四科特
居顏閔次一字不偕游夏留行誼旣軼名莫考聖門字之例

則優名耕僅據家語說取證牛耕劍刻舟須知具體不在此
聚訟斷斷一笑休

定興追感明季鹿太公事

北海亭久蕪東林局已散蒹葭白露濃
河流方渙渙太公古朱家好客分急難
左魏亦何辜星躔貫索貫子弟望門投
奴僕中道竄揮金納橐籥先生眞鐵漢
夜半走郵筒聞者爭駭汗獄楹芝草萎
永巷茄花爛九千歲安在山河亦變換
誰傾綠蟻尊休話烏臺案憑弔更無人
斜陽騎款段

豌豆初熟庖人取以入饌甚佳

青豆前緣結相思證一緘饋應彈短鈇
剛未費長鑿雪甲苗深護園丁草屢芟
雲腴油布幕雨隴碧垂繆屈曲冰蠶蛻
勻圓翠羽函珍原苞顆顆摘倩手摻摻
倒挂憐么鳳新胎剖小

蟻瓊瓏藤絡掇的樂菜根嵌范釜塵初滌蘇樹口正饒品教
卑杞菊味好劑酸鹹剝芡冰肌露芼薑火候嚴藍盈防扈竊
桃細謝鶯銜皺綠丸爭轉浮香七不賦充腸眞磊落滿嚼盡
璣瑛酒量慚蕉葉風情試葛衫頓增尊政與料免慧珠饒食
品頻充選農經又發凡江鄉鰕菜節爭不戀南帆

題唐姜行本紀功碑搨本

碑係磨班超摩崖而重刻者

班超漢奇材食肉隘蔥嶺投筆土苴茅拔劍泉出井手勿郅
支頭足躡車師境伐石紀殊功光與日月炳姜確伊何人魏
徵夙所屏宮苑土木興邊疆節鉞秉五色袍陸離六閑馬馳
騁直出玉門西萬五千兵領是時高昌道皇風文泰梗自大
夜郎強獻琛淮夷憬唐家軍械精戰士亦雄猛坐收破竹勢
何難擊柝靖想見沙磧橫初遂請纓請冬寒刀久冰夏熱膠

難檄天罰自龔行直繫單于頸臨衝突無前刁斗謚不做以
 此紀兵威例準式鼉鼉獨惜班生碑磨治付砂礪方竹規作
 圖文木鏤成癭觥觥刻頌辭毋乃胸臆逞古跡苦銷沈何異
 槃捫景柳谷路迢遙天山風雪冷片石比韓陵歷劫尙照晴
 文詞既簡率字法媿工穎居然闕滄桑鐵畫尙完整乃知傳
 不傳亦有幸不幸石竟默無言一任瓊椎打

姜爵

俞生

璣

貽我古銅爵古暈斑爛雷紋錯三足鼎立跋若飛左

耳有文曰姜作我聞岐水

即渭水

東徑姜氏城有邨即室外家

託羅史直云在美陽明為道元下注脚又聞太公垂竿渭水

濱入夢龍廳方鬢鑠至今厥配封若堂漳南一坏猶峯巒

姜太

公夫人墓在扶風城南七里

此爵近日出卷阿想見土宇飯章拓呂宅召

宅

二村名在召公鎮側

申土疆舉門應門

相傳故址今杜城里

聯琅塢周姜水滸

耀簪環邑姜戎車施篋鞞禮器明堂重上尊酌言醕之酌言

酢頰弁不侈金叵羅飛觥那需銀鑿落土花埋蝕五千年又

逐烏蟾看沈躍湯盤禹鼎久銷淪眼前一綫千鈞弱君不見

金石文字今汗牛爭收贗品持寸燭安得重起歐趙洪辭此

摩挲考訂分明不教紙上圖摹博古博

台山十詠追和齊息園韻

錄二

腳底冬亦雷頭上夏亦雪老龍橫身臥千年骨不折應真但

搖手休爲外人說

石梁瀑布

山勢逐溪奔船行不得泊但見山影移那識溪流惡葦岸風

瀟瀟夕陽和雁落

青溪落雁

王子宣

字南屏黃巖人乾隆戊申舉人著北遊吟草怡雲軒詩存遼水吟

縣志于宣天姿明敏根概盤深工制藝與方朴山

王雲渠相伯仲土講萃華書院十餘年多所造就

朱文治送南屏南歸詩小樊川下路留得臥雲身此地

有真樂長安無故人君今歸故里我待結芳鄰滿酌一

樽酒征衣

為洗塵雙硯齋筆記曾大父試罷南旋座師鄒曉屏侍郎手書

槐陰滿庭四字詩之同時劉松嵐刺史張船山太史及

朱少仙楊心田宋嶺山或以序或以詩投

贈之作幾滿行篋輒而藏之為南歸錄

王芝亭孝廉以陋室銘印譜一幅見貽作此謝之

湯盤鑑於水孔鼎寫以形後世有作者莫如陋室銘君家六

橋才絕眾王六橋進士芝亭猶子玉樹竹林相伯仲愛古直

探响嘍尖嗜奇不數藏經洞龍文鳥迹恣冥搜三真六草窮

源流希蹤籀史摹石鼓斯冰以下無匹儔自古立言貴不朽

壽之貞珉仰山斗不然灾黎禍棗如積薪後世詎復知誰某

君不見祖龍燔書乃立嶧山碑又不見永元之初燕然勒石

高談封禪世所嗤降而六代紛紛事篡竊劍閣石闕銘何爲
王君久蓄如椽筆藏鋒斂鏘處陋室室以古人之銘銘其文
八十凡有一位置安帖善雕鐫手裁圭璧成方圓畫沙印泥
復爾爾次第若璧合珠聯嗟我未能識字法況于金石辨灰
劫一見陡覺心眼開如鼎躍波劍出匣劍出匣鼎躍波懸之
壁上蟠蚪蚪何以換之山陰鵝何以擬之安樂窩

寶坻菊種絕希王生冬旭贈花數榦貯之瓶中感而有

作

重陽已逾旬霜氣清而肅花事漸彫殘客心寄孤獨忽聞一
瓣香瞥見數枝菊采之玉雪兒云比松椿祝相逢如故人足
音喜空谷貯以定窰瓶護以湘簾竹夜延明月陰曉汲清泉
漉寒花詎爭妍晚節自流馥佐酒醉添籌調琴聲滿屋澹極

竟忘言真意矢昏夙此種宜山林相招近輦轂物色久寥寥
品題多碌碌移樽列華堂當筵夸錦簇摘豔映釵鈿折枝命
僮僕顧影還自憐忍令違初服况乃塵市中賣花聲相逐荷
擔聳雙肩束縛盈一掬插架施朱丹登盆流膏沐塗飾在須
與謂堪娛俗目素質委塵鷲傲骨摧販鬻不如老巖阿往來
樵與牧念此長太息知己本難卜相與盟歲寒何須近食肉
聊作愛菊吟裁賤向花讀

何

稼

字亦怡號荇洲東陽人乾隆戊申舉人官昌化教諭著一鳴集

李國榮傳略先生年十一讀左氏傳即能以傳翼經釋音韻任昌化學官修

文廟

及土穀祠俱傾已囊不資於人知昌邑屈明府健庵

廉吏也卒後妻了瓜寒為營喪葬姚江朱少僊文治為

先生同年友任海甯學正嘗赴杭約一飲二人儉

樓相同集中春城兩布飽句志實也箸有明史補

王瀚序略先生幼有異姿家多藏書披誦不倦名宿如

趙蔭畦盧菊人穠蓬萊何遠堂皆仰莫逆交磨剗則越

中應鄉蠟昆季周雲屏張運谷更唱迭和仕唐昌則朱少仙樊寓沙沈王海李秋水吳梅梁往來贈答而少僊以吳梅村錢

牧齋况其詩先生於書無所不窺為詩文咄嗟可立辨

李品芳序略奧衍鼎彝斑駁旌旆森立孤風自叫啞

鐘復鳴壓蔗取汁燥蟒出血深箝幽谷崎嶇窈窕不阡不陌非途非路人皆怪而偉之

戴東瞻曰先生天才溢發緒密思清風格在陳鹿皮吳深裊之閒足使發華增色

擬韓昌黎石鼓歌 用原韻

岐陽獵碣磊磊者韓公乃為張籍歌我車既攻我馬同貫之

以柳魚雜何周宣繼文復境土以文經緯武止戈古者天子

不合圍春田犄角爭漸磨山林藪澤事搏獸選徒射中虞張

羅熊麕有力虎肉臊風聲獵獵山峨峨功成勒石輒誇美當

時歌詠殊卷阿文章不朽鐫之鼓黃金參錯神物呵剝蝕星

霜字殘缺摹以氈墨疑傳訛論者力排史籀篆其書非隸形

非蚪烝波淖淵處鯉鯉帛魚鱧鱧網漏鼉魏周蘇綽擬大諧
樛材偏埒珊瑚柯志怪亦言魏榆石沈淪一躍陶侃梭我周
諸侯豐鎬東汧岐曠隔路委蛇補天斷石女媧氏太行王屋
肩夸娥求魚乾谷渺何許江流爲汜潛自沱响嘯雲虎嶧山
火石經苦縣鐫光和或云石鼓屬西魏與秦斤權更異科其
文四百六十五惘然不辨猶繁多風塵遺棄重嘆息幾使荆
棘埋銅駝鄭餘慶者始置廟大昕祗肅旋經過垂數十年得
至寶匠心攻苦鑪錫磋向來聚訟每蠶起淄澠淆亂沿餘波
國朝釐定衷於一橋門十鼓無偏頗至治馨香謹抱蜀定以
甲乙耀自他拜手稽首讀一再用蠲澠浞差媿婀輓工束手
已骨立誰與考擊徒摩抄書殘簡缺去古遠蝸涎垂篆蛩吟
哦竊鄙馱經譯白馬迴殊掘地飛蒼鵝舜益地圖禹鑄鼎編

書無逸誦有那儒生好學克自樹敢以鬱塞辭坎軻春覺夏
閣風雨止仰見賢路明秋河都城奔走日稽古疇令歲月空
蹉跎

節孝張氏詩氏鄭人歸於鄭自有傳

閩範型三世張氏世有令德槎湖字十年及笄循內則嘉耦式餘妍

緩急資頤養晨昏泣涕漣氏幼失恃事父維謹婉從扶病起嚴侍束身

前井竈頻顛蹶庭闈輒愛憐堇菹思廩廩箕箒職翩翩莫雁

來人瑞歸鄭弗人鳴鷄得婦賢瓜心呼枕蓐柿葉映丹鉛佐讀雙

環珮懷清一鏡懸血痕殷夜雨弗人略血心緒繫孤煙患難磨蜂

螯憂勞象蟻旋弗人父中飛語奔走久之髻奴煩道阻藥婢撥鑑然月暗

狐重拜雲橫鶴已仙荷薪嗟髻髮遺一子彈指攬離絃誓近陶

潛墓空留鄭樸田螢光低宿草鵬臆感遺編麥飯盂誰任蘭

膏夜未眠舅姑尋否塞婚嫁歷屯遭弗人弟姊妹氏為之婚嫁燕縷闕春

社鸞簫顚碧天短車曾挽鹿靈蛻祇寒蟬箔捲垂銀蒜囊空

解翠鈿思萱勤視寢畫荻計陶甄娣姒恩逾浹鄉鄰戴益堅

雪融梅骨瘦霜隕菊英鮮事養悲難盡馳驅禍再延氏奔父兄之喪

著簪猶恤緯蕙帳忽沈絳白璧孀若青箱力勉旃銘旌貽

寵錫楷墨彙雕鐫鄭節婦詩已網撒凌鳧舄翰飛集鳳肩餘

風聞繹啟令則任郵傳碣石凝溪許琳腴捧日邊鷓鴣吟已

矣燕趙有歸鞭余時在都城方計南旋

車中景州上下百餘里民飢甚死溝中少有瘞者詩成冀司牧知之

馬首明殘雪蝸廬斷暮煙恤民無勝策終敵不逢年醉飽驕

何事飢寒命或然問渠拌一死惟蓋有誰憐

節孝蔣母韋氏詩

稟砧望斷孤鸞泣遺雛在抱未成立節孝誰齊蔣母賢閱六
十年如一日養姑如子教如父茹荼餐糲持門戶深望猶子
守楹書菊爪雖疲不言苦有石有石百尺長山神儲以題幽
光有溪有溪清澈底蔣母之心如此水

請旌已故順孫王正培先生八首

王昌
化人

玉樹烏衣巷山城赤縣秋固窮能善處將順益交修
岵暝煙隔餅疊涕泗流皤然承大母一綫繫弓裘

服習醫三世速邇算九齡水門飛練白雲幔捲山青
驥子從詒穀鴻妻與守經治家甘旨備造物尙冥冥

蟻渡危潭水鯨波泊岸沙引船疑夏統調瑟問瓠巴
肘後君臣藥根餘子母瓜旃檀呵護及當日重咨嗟

席壽憐羸弱幃單藉撫摩故山饒種尤涼月睠新蘿奈此沈

絲久其誰扼擊多白楊風四起酌酒向巖阿

朽壤兼封樹餘金爲締婚讀書詳系絡交態拙寒溫鹿飲香
泉壽鳩扶愛日噉一庭槐又碩相與課兒孫

蕙晦青箱學椿齡白髮年撫衷仍曩昔餘慕尙悠然宿雨濡
丸墨歸雲餉石田薰蒸坊表在不暇擬神仙

賚錫函牛鼎恩榮附鶴書重邀尋九頓載頌暨三餘屣倒迎
縫掖旌懸訪築居先生吾已傳想見白髭鬚

鼎鼐思繩祖庭闈計養親燕詒緣順德麀壽悉歸真孝感當
年事涵濡及後人有懷重戀戀敬止仰城闈

寫懷

愁雲四起天一碧樗社羈棲自朝夕太行王屋任在肩縱有
男兒不克力春歸三月桃李花棄官已久偏無家聚書數萬

讀未竟溪流蝕岸風搏沙百年近甚一彈指邯鄲富貴有如
此河水之河荷葉荷不負吾生曉姓氏

裴瑞興

字公紀常山人乾隆戊申舉人官太平訓導

清獻書巖

香巖曾記讀書來石徑深幽徧綠苔花雨一時人坐久冷香

吹上舊琴臺

趙蕙芬

字蘭生秀水人乾隆戊申順天舉人著西倉遺稿七卷

汪滋晚序略曩時同北榜者蘭生年最少其經術文章又越儕輩乃芳蘭竟萎箸述莢如豈非命與

秋夜雜感

夜寢不能寐起坐意徬徨念我母氏苦淚下謦衣裳垂暮憐
少子忍使悲故鄉父宦無餘資眾口支年荒揮涕出門去所
嗟道里長莫忘稽古榮努力謀稻梁

洪

字栖雲樂清人乾隆戊申武舉
福人官瑞安千總著看劍樓臚稿

林大椿序略栖雲先生善騎射嗜書史平生無他嗜好
獨好為詩與趙乙泉翁稚川友善時相倡和其詩宗尚
唐賢尤長近體指物抒情若不經意
而一種清微靜穆之致令人意遠

塞上感秋

畫角中宵起關山萬木殘馬鳴邊草白月照戍樓寒殘夢懸
清漢浮名寄繡鞍鄉書長不達日日倚欄干

中渡

野色正蒼涼秋山客興狂斷雲連遠樹飛雨帶斜陽為愛仙
台勝何辭道路長聞鷗沙際立應笑路人忙

至西興驛

曠野多清寂蕭然獨倚樓江山來夕照風雨入新秋孤客心
難定涼蟬嘶未休小窗今夜夢應是到東州

張中發 字士至
錢塘人

題廬山圖

只道廬山遠山今在眼前舉頭雲窈窕傾耳水潺湲藤樹千
年古煙霏萬壑連丈人呼欲出攜手陟層巔

沈 船 字笠人
仁和人

杭郡詩續輯笠人工書畫跌宕詩酒所交皆勝流畸士
尤善南屏僧小顛臥萬峯山筋恆累月忘歸村居郭北
顏其室曰夢禪老梅脩竹蕭然塵外觴詠其中無間
寒暑著詩千篇皆自寫胸臆瀟灑峭逸自成一家

西溪看梅同柯春渚吳桂巖蔣山堂作

積雨繞春郭門外波微添放晴鼓游興拏舟循西崦短約折
三五透水纔新蒹人家出煙際密樹圍低檐搖漾入香海恍
遇風雪嚴清影上下接皓彩珠璣兼妙有水竹襯到處胸襟
快疏籬若聞斷橫枝仍相黏青暎扶幽境詩句殊難拈移舟

泊村舍如坐梅花匳鼻觀通薺蔔卷起南山簾輕風散雲氣
吹玉來眉尖寒月吐平巘林杪銜纖纖高士得偃仰美人驚
遲流綠蘿映紙帳一宿神魂恬人隨孤棹返夢入寒香潛

秋晚游法淨寺宿白衣房用邱長儒葡萄方丈韻

勑游漸見炊煙白微嵐擁出前山月琳宮碧瓦隱沈沈桂子
巖坳墮香雪涼風透袷體欲仙幾人到此換凡骨四圍古木
卷潮音徹耳一聲清磬發閒居闌寂人語稀慧業三生靜因
結星彩橫空滴露華眼消障礙心除熱老僧頗解文字機詩
義禪那不降折寒燈如豆琉璃青寶光相映鑑毫髮譚深不
覺山雞唬支剋單牀衾似鐵起來坐看雲氣生尺五斜窗曙
光潔佛奴婆娑爇炷香靜聽蓮花峯名叫鶯鳩苦荈浮藝倩客
嘗一斛珍珠下喉舌催歸艇子翦晨波去兮分題誰最傑

早秋度慈雲嶺

西風吹不斷暑氣已全收嶺抱知湖曲江空見塔浮白雲山
下路黃葉寺門秋正欲尋僧去鐘聲到上頭

庚申春杪偕張堃渠明府至潛州作

山行信宿喜初晴古木幽花夾路明入邑尙如村店冷沿溪
祇覺麥風清日斜僧在天邊出雨過牛從屋上耕欲傍飛泉
攜短榻虛堂涼夜寫琴聲

許士杰

字醒夫海甯人官湖南湘陰知縣

馮浩撰墓誌醒夫選陝西扶風丞時金川蠢動奉檄總
理鳳翔府軍需縣互四百里向皆取諸里下事竣略給
值君力請上官先給資而後具供億故事皆豫辦有大
兵已過而民間不知者君署郿縣事察吳振疑冤獄請
豁被災坍沒糧額其後復選湖南武陵縣丞以賢
能多惠政上游重其才因報最得授湘陰知縣

初入扶風署散步家大人見示詩韻

緬懷千秋業不出十年讀吟嘯締古懽何心問除目雅有命
世士自詡豐年穀投鞭急功名未肯老破屋鳥翼而魚鱗性
各安飛伏維我淡蕩人底事浮雲逐亡羊悔何追得馬敢謂
福俯首轉自嘲一官等尸祝

迢迢君與親南北三千里臣壯不如人其敢希臚仕哦松忍
負丞一編書甲子所愁白雲飛難駐紅日駛天涯守治譜幸
未橘化枳違養究何心屑屑實堪恥低頭潛制淚欲書少長
紙鄉夢中宵歸脈脈渺雲水

王啟焜

字東白號秋江嘉善人官四川鹽茶道

水竹居集飲次玉厓韻二首

池館新開集勝流罩檐濃綠竹陰幽鷗盟似雨聯今舊萍蹟
隨風感去留醉倚鶯花三月榭夢迴鰕菜五湖舟俄聽隔水

笙歌細籠霧和香一片淨

雪山西望曉疑煙一曲春波花壓船甕啞村醪頻削管蜀中田家

多造啞酒以水灌甕中插竹管吸飲之盤餐園筍不論錢詩情斟酌多餘味官

事消磨少雜緣最憶比鄰還步履余別館巴山夜雨齋即在屋北每攜樽酒

話燈前

朱星煒字垂青海鹽貢生

縣志星煒少有文名父患脹疾星煒露禱到股和藥療之又嘗均已產與弟早卒撫遺腹成立嘉慶己卯詔直省舉報孝行大吏首列星煒名祀孝弟祠

鴛鴦湖權歌

絡絲車響燕雛飛柳絮風翻豆莢肥尙有濃香蒸曉露花花

開徧野薔薇

飲露餐英學楚騷九秋風味欲題餠未興百里平於掌祇有

瓶山數尺高

紫螯黃雀數江鄉收得香杭十里香正是太平風景好夕陽

扶醉過橫塘

鮑廷博

子以文號淥飲歙縣人寄籍烏程著詠物詩一卷

定香亭筆談以文家藏書甚富無不知其源委有夕陽詩盛傳於時予贈以詩云清明卽是長生訣當世應無未見書何處見君常覓句小闌干外夕陽疏緝雅堂詩話余嘗過揚州書肆見有知不足齋日記鈔本密行小字閒以塗抹多是淥飲主人記得書因緣及與諸名士往還商榷之語畧閱數葉方欲歸之篋中隔日再過已屬他人悵罔久之倘藏者好事爲之刻布重見人間亦藝林之雅譚也

夕陽

一市人間夕又朝晚來依舊滿閒寮疏分霜葉秋容淡細點征帆別思遙澹澹欲隨城角盡明明還帶酒旗飄迷藏慣匿

西樓影不似春愁不肯銷

誰復揮戈似魯陽放教容易上西牆片時春夢無蹤跡一霎
秋山乍老蒼隱隱笛聲牛背冷恩恩鞭影馬蹏忙何由更買
長繩繫暫曬相思鬢上霜

底事人閒重晚晴當樓殘照最關情百年身世霜鴻影萬里
江山畫角聲征馬雲邊驅轉急歸舟天際望偏明倚闌無限
蒼涼意費盡閒心寫得成

鄭遵信

字禮耕號柳門歸安人著得閒山館集

折臂吟

仲弟曉園年踰四十齋志以沒作折臂吟

癸丑秋七月弟又適楚地出門逾三旬侵晨卒然至執手一
嘻噓相看頓顛顛爲言抱病歸舟師頗見忌同行賴故相知

隨不相棄江神送好風涉江亦云利還家且稍休自度病無
累如何旦夕閒舍我出不意號咷撫爾骸痛甚折吾臂

一世爲兄弟苦樂相支持如聞到蕪湖有病行稽遲豈謂蹉
跎久遂致不可爲修短雖有數實恨無良醫命盡在夜半黃
昏猶未知此情良難慰此恨無終時已矣復何言與爾他生
期

鮮民生不辰一炬空吾廬相期振先業卒歲無甯居湘中與
穎上弟留九載餘時乖志不遂彈鋏歌無魚去冬返窮巷談
笑怡怡如兩杖交頭倚傷哉此願虛

未至巴陵前亦復事株守余時客西泠書來頗自負寄我遣
興詩清新而醇厚今看曉園吟猶存三百首天若永其年所
得止此否

同氣惟弟妹三人無閒言妹也稱未亡弟又赴九原纍纍孤
兒女未字亦未婚成立能與否今茲且莫論後死者職耳吾
甯辭其繁

生同三閒屋死則同山邱相依父母側九京期從游斯言猶
在耳斯願應可酬平原求吉壤隴樹栽松楸魂兮儻歸來胼
纁春復秋

庭前雙桂樹花氣盈庭階對之念手植觸緒悲孔懷不應當
溽暑長路勞芒鞋恨予不汝止致汝先子埋雖非死道路斯
言強自排嗟予久病目血淚無多措

死生雖云命憂傷令人老弟年四十三去我亦何早雁行已
失羣此身那自保勉謝親知言勸我豁懷抱讀書勉遺孤庶
或慰潦倒

三月晦聞春帆表兄南韶之喪寄輓二首

兄名嘉言蘇門先生孫

連宵風雨起離憂酒散燈昏臥小樓遠赴未來先噩夢日歸
何事又淹留曲江春月淒涼曲南浦楊花細碎愁一霎浮生
君早悟手營生壙樹松楸

似聞鬚鬢已蒼蒼旅櫬俄看返故鄉推食有心無上策多才
為累獨深傷五年一別成生死萬里孤魂可閉藏尚憶詩懷
程正輔痛餘猶自檢疏箱

林

字秉三號心竹慈谿貢生官西安教諭著心竹文詩稿

闕傅舊居

江東人物劫灰餘太息先生此舊廬姓氏已聞題夜月英雄
猶自困傭書高墉他日紛塵市芳草於今護梵居湖水淙淙
遺澤在寒煙落日渺愁予

宸賞陳風動使旃諸生臚岱吠美俗化湖堦樸學蓄畚正清
衡月鏡圓公餘仍矻矻才調自翩翩著錄都金石哀尋逮澗
泉拔尤人十五搜篋句三千淮海英靈集輜軒甲乙編稍因
疎侍從曾不廢丹鉛舊夢登瀛侶方春出谷遷詞臣奇玉局
史館總班堅翰墨

南齋裏

絲綸北斗邊青雲蒙不隔絳帳會高懸聽鼓陪晨直簪毫憶
穴緣多輪稽古力敢附纂書員畫幅能風雅經帷想練研元
風昭縹緙翠琬入陶埏世叔五行下尙書半臂傳也應讓頭
地

文治贊無前

張炳字芑塘號綺堂錢塘人乾隆己酉進士官福建晉江知縣改義烏教諭著來鵲山房詩稿

杭郡詩三輯綺堂家貧好學素性友愛常以敦宗睦族為後學勗已西捷南宮出宰裕城歷任沙縣閩縣南平晉江所至循聲卓著改官粵東以年老就教職嘗結南屏詩社萃為百詠足當山志

游甘露寺兼訪海嶽庵遺址

肩輿迤邐繞城隈出郭探奇第一回塵迹尙餘孤塔迴詩情半為夕陽開西來露氣清香界北顧潮聲歷劫灰海嶽風流猶未遠閒尋蘿徑重徘徊

姚

杰 字秀峰號山臞會稽人乾隆已酉進士官河南溫縣知縣

青青女貞樹為貞女余育英賦 并序

育英增祚次女幼失怙事母以孝聞母疾割股卒不起兄以貧故游幕不歸嫂早夭女賴十指辦兩喪或勸之嫁焚指誓志兄子甫五齡撫之成立卒年三十

一歲

青青女貞樹經歲無枯榮啞啞反哺鳥失母常哀鳴余氏有

女孝且貞終身不字酬所生能知大義延宗祊一解幼而無父

中心銜恤長而無母煢煢一室剜肉和藥莫療母疾欲從地

下懼二人之不血食二解阿兄遠行役一去無還期阿嫂歸泉

壤遺此黃口兒兒無知女心悲我其保抱之我其提攜之三解

盛年處幃房素服屏簪珥蹇修為我來卻走掩兩耳吾兄無

嫂幸有子誓當相依其生死永夜涔涔淚不止不諒我心視

我指四解指屈難復伸與兒為一身何以育之紡績是勤何以

誨之詩書是陳五解明月入牖素帷在堂念我父母中夜彷徨

眴勉窳窳臨其穴涓涓血淚霑衣裳浮雲為鬱結飛鳥為悲

翔六解古井水波瀾息冬嶺松冰霜逼女之志死靡慝三十年

如一日土一抔父母側世子孫思其德七解安得朱絲絃彈

出靜女歌孝思維則兮貞名不磨鑑水洋洋兮稽山峨峨八解

秀野亭

危亭出林表繞檻盡花竹眾香難為名濃翠如可掬何人亭

下來相顧鬚眉綠

陳 泐 字文水錢塘人乾隆己酉舉人著螺峰草堂集

杭郡詩續輯文水居紫陽山四宜亭側性耽白業晨起則舉家梵誦其弟清波沛霖亦能詩屠琴鳴贈文水句云山居雖僻甯辭遠道氣常充便不飢老去全家都學佛尊前有弟與談詩讀此如見其人矣緝雅堂詩話文水性愛吟咏才思聯翩如樓霞嶺謁輔文侯墓云腊毒一傾田帥酒將星忽隕岳家軍登瑞石山云江甸黃沙明返照海門晴雪上寒潮宋望祭殿云千年恨事收三輔一片殘春畫七陵又明霞不成晚眾緣遠浮湖十字可稱秀語

湖上觀荷三首 錄一

綠楊冒平磯涼影掃蓬背開船劃波去漾入嵐煙內近來西

子湖荷花漸稀碎頗聞丁家山新荷冒石埭黃緣進望山橋名
又爲菱葑礙瞥見風翻處新紅映山黛船頭漸泊近柄柄與
窗對衣上逗微香體中生淨愛吾儕俱中年性亦嗜恬退祇
爲米鹽累俯仰逐流輩何如插荷人水扉大自在漁娃爲牽
網兒女操井碓摘荷入城賣百物歸自戴秋風落粉紅翠葉
又堪刈住此山中邨清涼無病痲取笑觸熱人紛紛穿襪襪

牧羊行

牧羊兒爾何人滿山牧羊三百羣山坡草長蟲亂叫以肱麾
羊羊亦馴一羊齧草草赴吻口含碧草顧其牝一羊不齧草
中立四蹠直豎角濺濺前有兩頭寢不訛後者上坡不降阿
跛特躡躡牽跪乳散亂草頭蹠角多獨有一羊伏石磴四蹠
反跪目睛定昂頭靜對似有聽長鬚垂垂適其興我從山中

來玩物夕陽裏愛此牧羊兒蓑笠好生理古人學儒兼事牧
牧豕牧羊衣食足長垣澤裏任人笑我自截蒲寫書讀後人
甫攜一束書鄙棄樵牧齋中居生理蕭條百感集好古志懾
飢寒俱嗚呼好古志懾飢寒俱附寶依梁稱大儒

題韓昌黎集

正氣能扶八代衰上書宰相卻因誰亭林論古頻嗟惜此是
唐朝一大師

感事

兒子紛紛世網中談詩論學少和同老夫自有煙波樂浪醉
西風一釣篷

張

焜

字育仁號偉齋錢塘人乾隆
己酉舉人官安徽廬江知縣

杭郡詩續輯偉齋有循吏名年
未五十解組歸奉母不復仕

觀穫

天寒禾黍熟愛此郊原居况逢彌月晴一片黃雲鋪耕種亦已畢刈穫村村俱丁壯筋力瘁老穉顏色舒斜日背山阪野風吹衣裾鄰翁相顧笑邀我田中廬自言今有秋比戶倉箱儲但願無飢寒求盈非我徒田家多辛苦過此閒有餘相攜一樽酒酬酢情殷如自愧塵網人勞勞長江湖始知衣食謀力耕良不虛

邵希曾

字儻齋號角雲仁和人乾隆己酉舉人官河南桐柏知縣著松鳧吟草

府志希曾宰桐柏時有鹽梟捻匪出沒其間居民苦之乃令各村集創設門夫設立柵欄以重啟閉姦蠹匿迹民氣以安書院課士增設膏火月必親課其詩律音韻有未協者往平仄覈真一册分給各鄉塾不數月文風日上士知厲行于宛屬稱最焉嗣又親歷各鄉勸設義學集錢萬餘繕設經學三蒙學十五分列城鄉訪師訓課來學者日益加多擇其學業有進者入書院肄業無力子弟不嗟失學矣以勞卒于任喪歸之日涕泣以送

者數十
餘里

扶溝謝署尹乞白菜次蘇公春菜韻

圍鑪芋火燒殘葉，侑飧不數菁。與蕨御冬旨，蓄誰最宜桐。邱
晚菘冠脩滑，北方飭盤嗜。獨殊薤白椒，紅恣辛辣豈知沃。土
出佳蔬玉立寒，畦青一抹賓筵蚶蜆點。金衣奴視波稜展，鐵
甲最憐霜罨醞。肥濃卻怕冰澌菱，芳茁老饕飫此已。年年蘇
荔盧茶有成說，遲君繼餉饜清饒。莫待江郎想兔脫。

薛 梓 字味軒 和人 乾隆己酉 舉人 官紹興府訓導

余氏雙節詩

龕山西去臨淵湖，上湖萼滑如醍醐。萼心孰與松柏殊，風霜
雨雪長不渝。一門雙節世所無，今得見之婦與姑。憶昔在家
為女初，孝哉中外人。言孛來歸幾時良，人殂懷中賸泣兒。呱

呱予手拮据口卒瘁如卵翼長成兩雛奈何摧毀不須與深
閨又見增歛歎事君三載今焉如欲哭不哭心踟躕古來兩
世一身孤在孫惟汝子惟吾豈知今者不畀余無復痛斷餘
根株夢中有時語阿夫覺來淚迸紅珊瑚吁嗟哉人皆集苑
已集枯叫天天亦憐無辜君不見伯氏有子終懸弧再傳血
食猶能圖又不見表微手筆爭染濡放辭一灑皆瓊琚寒天
玉雪瑩冰壺兩心千載同區區

許嘉猷

字儒吟號順庵海甯人乾隆己酉舉人官江蘇沛縣知縣著順庵詩集

府志沛縣黃水泛溢屢爲患嘉猷謹修隄防終任無水
災嘉慶己巳浚沛汛運河七千餘丈購水車教民屨水
事半功倍自十一月至明年二月日督千夫從事畚
局不少怠踰年乞歸家居二十年構遂園以終老
杭郡詩三輯順庵善行楷書老而益工遠近乞書
者麇至靡不欣然應之嘗三爲江南鄉試同考官

來鶴詞并序

嘉慶丁卯錢恕堂大令與予同官白門謂淮海閒多
陽鳥惜羅致匪易迨解組後門下士金孝廉志岐秉
鐸海州使人肩籠雙鶴載至龍山遂園中昔先雲村
公得二鶴於揚其一畀弟樂仲翁畜所居東偏濬池
飲之釣魚捋稻食之甚狎而適曾作鶴所記并屬文
徵仲繪圖諸名士題詠垂之家乘今其事彷彿乃爲
來鶴詞一首以志之

凌風仙子海上來幽人晤對懷抱開意態昂藏薄雲漢鸞鳳
同羣非下材何爲仙禽遭羅網頓令斂下長低徊飼以稻粱
屢驚起或集洲渚或山隈物性耽潔復警露夜半聲聞徹九
垓莫效支遁恣玩好鍛羽反顧令疑猜我今養成凌霄翮翱
翔任爾登蓬萊

程文淦

字子質海甯人乾隆己酉舉人官縉雲教諭著子質詩藁

應時良日子質初就傅讀昌黎文仿其意為闢佛論鄉
試出寶東皋先生門大挑一等改官選授縉雲莅任二
十餘年余初學為詩子質見而賞之後有所作必細摘
其疵類不少恕自得交子質始知詩律之嚴也子質所
自為詩文成輒削稿余所見不及十之一嘗寫所作詠
手鑪五言排律貽余謂他日有選古今體詩者可錄存
焉

梅籟隨筆子質又能懸腕作草書
別饒古趣品格峻潔如其詩文

手鑪

裘襲風雙袂鑪鈔火一杵分攜金箇箇同就玉摻摻瑩質磨
流汞腥斑洗鍊鹹交枝環宛轉鑿竅蓋空嵌翠藻鳧游喙朱
櫻雀啅鵲擎宜承露掌鏤想琢雲鏡圓折工裁璧方校巧斲
城白搖銀海氣紫捧璽書函數數珍匳各提提弱腕咸製規
齊殿麗名陋博山巉熾炭廚娘送添香侍婢監獸形堅耐過

龍腦屑頻攙箸偶消閒撥囊還避熱緘待時鸞鏡掩應候鳳
 珠銜燠比春回谷暄延日駐巖晨熏妝澹沓宵擁話呢喃呵
 子鄰棋局藏鉤半酒榭指螺溫欲旋肌粟煖全芟蘭汗蒸微
 漬蓮泥淺欲劓唾花烘紺袖淚點熨青衫釧夏憐呈豁莢循
 忍受黷焙衾饒妾倦煨栗謔郎饑燒劫沈灰淺靈局闔櫝嚴
 寵承秋葉棄功著凍蠅讒燕市裝搜篋鴛湖買落帆勞薪炊
 束桂餘燼拾枯杉做縕寒猶甚兜羅輒不凡撚鬚冰窸率拂
 鬢雪蕭影硯炙鸚睛活毫融兔穎龔吟垂纖手重感抱寸心
 誠

朱廣川

原名淞字松溪嘉興人乾隆己酉舉

府志廣川以大挑知縣署福建甯縣邵武府同知有
 循聲親老改就儒官培養人才訓弟子立條諭治經有
 法寢饋其中行年八十猶丹黃校勘至三四易稟著有
 周易釋義毛詩廣訓春秋三傳異同考孫吳子輯註樂

章律呂編禹
貢輿圖志

江中春雨

連日積陰霾春色暗江郭野店寂無人細雨梅花落

古城關

山行鳥語聽絲蠻瀑布飛流竹石閒貫酒旗亭春色晚落花
零雨古城關

明妃辭

閭闔晨開受享王掖庭賜出靖邊方佳人莫怨丹鉛誤詞客
空憐粉黛香璧月秋空邊草綠玉關春斷塞雲黃女戎無限
興亡恨遠嫁傾城策亦長

書南鄭侯傳

眾吞十萬語偏雄自拔牙門督漢中秦嶺擣虛原上策陽谿

兩浙軒輊錄

卷十五

朱廣川

書

走敵是殊功將軍傲氣終孤立文吏私心半黨同異日參軍
傷落度骷髏飲恨沒精忠

曹應穀

字式堂嘉善人乾隆己酉舉人官
四川清溪知縣著寶笏山房詩鈔

高宗

純皇帝南巡
校官詩錄式堂幼有神童目弱冠恭逢

召試

西湖
初幸新都為先人舊治合州遷治鹽泉囑匪南溪捐俸

振飢彭水代民輸賦補清溪忤大吏歸改教職授定海
學前隙地民為蔬圃使棄其地而償其值著述甚富
喪後遺失

感懷雜詩

房星降自天化為馬汗血騰驤志千里意態何驍傑嘶殘沙
漠風踏徧峨眉雪一朝走江南輪蹄盡銷鐵藉非伏櫪情胡
為受羈縲蕭蕭北風起昂首思電掣

涼月忽在牖曉風時啟扉草深螢火滅林靜蟬聲微仰看山

容瘦落葉上我衣萬物各有時盈虛理不違班姬苦離別團扇情因依人生貴行樂吾道未爲非

造物每忌名名成亦有數宇宙筆一枝才人如碁布其他泯沒者豈遂盡耗蠹亦有壽名山品題羞驥附攤書自慰藉富貴草頭露丈夫不朽業毋爲青袍誤抽毫神鬼泣落墨風雲護黃葉滿空階流光實可懼

中年多哀樂頓失強記力手披書萬函心游天八極掩卷輒健忘開編疑舊識束髮受六經如石銘胸臆儒冠來誤人草草事塗飾歲月坐銷磨性靈半薄蝕恨不化蠹魚神仙字三食捫心悔已遲名者學之賊

放言

湖海平生志蹉跎二十年神鯤秋試水雄劍夜摩天少達眞

非福奇窮乃益堅健兒莫相笑老將半幽燕

踏徧江南路秋高鶴共棲論文矜舌在作客恥頭低奎象分

牛斗邊聲息鼓鼙中宵頻起舞夢到玉關西

去官後僑寓成都為南歸計感懷八首 錄二

雪窖冰天路曲通一聲羌笛萬山中飛符似火徵求慣供帳

無才典質空盡日丁男嗟鶴埵如雲甲騎走蠶叢

聖朝頻下勤民詔慚愧難希循吏風

角逐冠裳廿四年小園松竹待歸田已空蕉鹿三生夢好趁

尊鱸七月天報國無能他日補去官微罪故人憐陽城下考

尋常事回首棠陰倍黯然 感先大夫官蜀中

屠本仁 字純清號道甫桐鄉人乾隆己酉舉人官麗水教諭祀名宦嘗碧玉湖吟稿

梅篔簹筆公好考證兼嗜金石鈔纂摹拓靡有暇日諸生請業者勸以治經之法性嚴肅上不甚耐既去乃見

思焉

畚客三十韻 并序

處州畚民俗稱畚客舊本盤瓠遺種順治間由交趾
遷瓊州再遷處州深山耕作畚婦戴布冠綴珠石赤
足負戴土著者指爲異類向不預考嘉慶閒大吏咨
請一體考試今已有入學者

從官至山鄉往往見畚客其來自南荒

聖世有苗格安插向內地一一畫疆場枯蒼浙東陬百年此
焉宅攀陟重巖艱依棲窮谷僻斫畚刀耕舉燒畚火種蹠荆
楚有舊風屢徙罔移易有田復有廬牛宮與雞柵雖未列編
氓久已供賦役生齒日以繁轉惜山土窄開墾有畸零樹藝
無空隙輿丁及擔夫餘力耐勞劇笞辱等人奴謀食不違惜

三五女負薪鬻市兩腳赤筠筒綠擁髻布幅青搭額州人輒
鄙之相視笑啞啞數典及盤瓠傳聞自荒闕旄牛越嵩連參
狼武都隔遺種嗤戎羌誕語肆譏斥范史姑勿引杜詩庶可
據古者五谿蠻大族相接迹於今諸土司猶得通仕籍粵黔
川楚交獠獠蒙教澤卽此十縣間畚客且千百子弟秀而良
亦足備選擇字或識九千弓可挽五石以之充學僮漢法不
相借大吏請於

朝準敕

恩光赫令下郡縣庠五姓咸歡懌雷藍鍾盆雙五姓
音變格磔 吾試與之言蠻

泊舟柳陰隄間歌

隄在麗水縣郭溪
旁多種柳以捍水

柳陰隄畔柳如絲記得桓公手種時樂府宜歌發白馬新詞

誰唱比紅兒鱗鱗細浪金沙活葉葉輕帆桂棹移添築小亭

好呼酒千秋秦七有相知少游詞有柳邊沙外之

盛植才

字含英號墨峰又號韋廬慈谿人乾隆己酉舉人官廣東雷州同知

王牧園曰巒峰詩才明敏嘗遊蔣樛庵先生門極為稱賞後仕嶺南檄勘蕉門黃圃潭州諸臺汎歷南沙金洲諸島輿揚帆鼓棹與邵廣文芝房中流徙倚擊楫賦詩合鈔所作曰蓬窗集每拈一韻與芝房更唱迭和至數十首猶妮媿不倦蓋其才華豐贍非枯窘拙翬者所能及也

珠江

一夜歸來晚清遊興未慵嚴關深夜柝古寺隔江鐘近水樓

偏好尋花客乍逢迷離鴻爪影何處認前蹤

陳元枚

字卜庭號著庭鎮海人乾隆己酉舉人

風雨過鄱陽湖

白日忽變風怒號馮夷擊鼓飛驚濤篷上雨點亂如石惡浪

翻空天半高航工舟子驚相呼倉卒收得十幅蒲為語舟中
莫輕動扁舟已入鄱陽湖鄱陽湖水最洶湧汗漫黏天若山
聳蛟龍巖屢飛欲舞寒潮衝擊天吳怒安得夫差水犀手萬
弩齊張射潮口倚蓬怒叱陽侯驚鼉鼉迹風浪平忽聞大
聲來水上噌吰澎湃如鐘鳴徘徊四顧皆絕壁石鐘山下波
相激為問坡公舊遊處滿岫蒼苔濃欲滴

李

灑 號鐵橋山陰人乾隆己酉舉人官至貴州按察使

緝雅堂詩話鐵橋久官吾鄉以愛土稱曾知肇慶惠州二府事于端溪書院豐湖書院均捐置書籍儲藏院中以供諸生觀覽今其書尚存此邦人士猶能道其政事可謂賢太守矣

題徐壁山太守小影

民得賢侯歌且舞上國之賓眾人父縹緲稽山一片雲散作
千家萬家雨十年席帽走風塵長安昔日看花人一朝捧檄

來江右神君之譽交口稱陽城特膺上上考仁風惠露滿江
表誰知廉吏左遷多太守歸來艱一飽當道需賢幕府開高
冠長揖先生來一疏能蘇十萬命豈但詞藻凌鄒枚江湖浩
蕩客星朗智珠在握神益益陰德及物耳常鳴清談于雲手
屢抗吾儕當讀有用書漢唐循吏今豈無曾聞折獄出經術
愛民如子真丈夫我忝同鄉稱後輩政事文章夙心佩和風
煦日蘭上亭可許圖中撰杖侍

秋學禮

字立亭山陰人乾隆己酉舉人官秀水訓導著補齋文集

汪如淵傳略先生年三十師苑三樵先生日子忠信力行卓然自立行修矣博極羣書無閒寢饋學勤矣不患不成名也七旬餘朝夕必有正業歿時語子金日善讀書無妄求可以自立可以樂道

望雪

連夜朔風勁滿庭殘葉翻萬山都削玉一鶴尙當門沙遠若

無岸樓高知有邨愧非梁苑筆相對且傾尊

鍾山 字振元蕭山人乾隆己酉舉人官雲和訓導

寄懷諸兄

憶別鄉關淚滿巾至今猶恨素衣塵一千里外拋兄弟十八年來飽苦辛姜被夜寒邊塞月荆花愁望故園春不如歸去安田宅頭白重敦天性親

谷廷桂 字森五永嘉人乾隆己酉舉人候選員外郎

贈金左莪 璋

博雅襟期妙論新淵然玉海浩無津我推後輩為前輩君是今人識古人賈島詩才會鑄佛鄭元經學久稱神自憐書劍飄零久未稱男兒八尺身

查錕 字金扶號也山錢塘人著樹陰書屋詩鈔

陳塘序略公自言五參戎幕騰躍金戈鐵馬中袒其衣
刀箭痕著體又言善星辰禽遁之術陰陽消息如指上
紋不遇命也出示所爲詩高五寸許豪宕感激如其爲
人嗜古金石文辨據甚詳讀書尤精熟覆誦十三經并
其訓詁汨汨然若瀉瓶水無一字遺者抵掌談事數道
楊忠武用兵神施鬼設齊羅桂諸將軍攻城野戰到山
岳鞭風霆而關河扼塞出奇制敵之方
可指而尋也其說亦時時見于詩云

崇安道中

籃輿穿紫翠處處石爲門松老龍鱗活山深鳥語繁炊煙浮
竹鳴籬落護花村一水彎環瀉知通九曲源

澗水聯閩海分疆庾嶺我神仙隨處降文獻此邦多茗啜三
山味琴鳴四境和荒城形似斗面面倚巖阿

沈方約

字芷汀
錢塘人

巖州

亂山中斷處一郡枕江流水有時齊岸潮從不到州遠煙城

市晚野色郭門秋合伴高人住偏尋景物幽

朱文藻

字映澹號朗齋仁利諸生著碧谿草堂詩集

梁同書傳略明齋館振綺堂汪氏任校讎之役汪氏富藏書自是所學日益文名日盛業師沈耕寸先生衰疾困頓躬湯藥視寒煖者十餘年及卒為營喪葬行誼類漢人黃司馬易招游山左時阮督學元孫兵備星衍同任一方篤嗜金石與之商訂塌本甚富成山左金石志又分編兩浙輶軒錄分纂嘉興府志王少司寇稷復招君于三泖漁莊纂輯金石萃編大藏聖教解題各若干卷以少寇下世不及竟著有續禮記集說碧谿草堂詩文集碧谿詩話碧谿叢鈔東軒隨錄東城小志東皋小志青鳥攷原金箔攷苔譜萍譜竝藏於家其說文繫傳攷異已鈔入

四庫全書中

胡敬序略業師映澹先生其文如澄川不波濔漾無際詩其緒餘然篇什極富大旨主詳述事迹多自注足資攷證不屑屑模範山

水蹈江湖家流派

杭郡詩續輯明齋先世居建甯白眉村有泉曰碧谿至其父始徙杭州居艮山門外鄰人不戒西林吳先生護祖宅俾居之廣可二十畝南繞一水桑畦麥隴荷池相林地極幽勝遂名之曰碧谿草堂因以自號不忘祖也

蒲褐山房詩話朗齋漁獵百家取材宏富精六書自說
文繫傳佩觿汗簡及鐘鼎款識博古圖諸書無不貫串
源流會其旨要又能手摩非徒以形聲點畫自名小學
者可比韓城相國督浙學時訪而延之至京師佐校

四庫全書復奉

敕在南齋攷校事宜亦俱諳習又通史學凡合紀傳編年紀
事通典諸書輒能考其缺略審其是非先嘗助于修西
湖志後助子撰金石萃編訂正之力最多其詩在劉夢

得張文昌之閒正如
空山鼓琴沈思獨往

緝雅堂詩話朗齋汪氏三年亭館絕勝日與湯尹亭
孫愛白趙恆齋張我軒及主人羣季滌原兼山秋巖分

題鬪韻詩如束筍錄其佳者曰投壺詩存齋中有銅壺
仿温公舊式以為雅集彈指之際已判生死讀其記文

不覺振觸記余疇曩與同鄉諸君子有金臺詩會與者
梁詹事耀樞陳編修序球譚樞儲宗浚姚編修禮泰張

編修鼎華崔編修舜球歲月易得都已隔世
存者僅數人耳咸舊之懷視朗齋尤過之也

瓣香吟會耐祀耕寸夫子

夫子儒林望騷壇雅範垂生平能略述往事總虛追襁褓聞
京赴庭幃賴母儀丸熊三載苦負米七年支覽古金陵道舍

衰會聞臨穴痛直欲叩天知文戰家須振秋闈數屢奇遂因

詩見志兼得友同治坐上春風暖階前化雨滋西谿吟侶共

東郭舊廬移杯罍春秋舉歌呼且夕嬉合并難永恃人世竟

長辭天地遺編在鄉邦舊獻思草堂今日會展奠酒傾卮

巖鐵橋輓辭為諸友作

仲子居東里三嚴紹禹航君才真倜儻吾輩共相羊江郭論

交久謂沈桐谿河橋問訊常謂魏柳洲課隨分硯席謂孫綠天半峰居幸接垣

牆謂胡荇唐椿樹尋茆屋謂何春渚園前話夕陽謂張禮園草萊同病廢文藻

自謂曲木負年強謂沈玉屏會自南行始謂陳蕙堂神因北去傷謂蔡壓鳥園

書邀鑒賞謂鮑涿飲篆隸示周詳謂朱晚樵誼並聯河渚吟兼擅瓣香

雞羣推鶴立雲路獨龍驤試為生平述難教往事忘孝無虛

戲綵友倍樂聯牀推解貧交及規箴直道彰告人無耳語排
難竭心益拂意歌當哭摯情激類狂多才率天分餘事及辭
章詩學家風舊詞源峽水長能文縣世澤作賦擅名場金石
摹文古烟雲落紙颺書堪追漢魏口善叶宮商正字精矴俗
通音妙辨方信知凡近罕不負姓名揚一預賢書薦宜霑藝
苑光豈期逢偃蹇未易試鋒鋌東海譽偏重南宮幟莫張歸
來閒里巷別去走閩疆鬱鬱無知己迢迢阻故鄉三春多瘴
癘二豎染膏盲旋里山程苦歸舟水驛忙憂惟貽白髮閩己
厄黃楊訣友情牽袂辭親淚滿眶傳經餘弱子歎逝慟高堂
墨瀋留珍重詩編輯散亾哲昆哀悱惻世父傳輝煌明聖湖
波靜南屏嶺樹蒼舊時同載酒明日痛迎喪朋輩思平昔哀
辭綴數行蓋棺名己定聚首願難償會台仍簪履悲歡異肺

賜請看雙挺燭不似屢催觴

陳石泉得古錢諸品甚夥余為盡拓其文裝為二冊復

采洪氏泉志及諸家說詳註其下因用樊榭詠古錢

韻書後

洪鑪百鍊煥有文寶貨那至隨烟雲石泉好古與余共賦性

竟不殊猶薰寒風蕭條馬市嘶石泉所得古錢在馬市街市肆才于巷陌逢

人云招攜更入草堂坐貫緡纍纍炫昔聞一錢十易或百易

數逾六百囊裏勤正號合并百代主偽品遐晤重譯君文字

洵足補鐘鼎量衡尤得權銖分滿匣金精益綠質拓本朱文

訂甲乙文旁瑣屑箋釋詳前輩後洪或能匹董道作錢譜殘洪遵作錢志殘

年呵手審排編春雨低窗展蕭瑟洞見萬古利物心摩挲百

變錢神術流移自數上聲離台多閱歷熟知人代疾貧兒探囊

亦何有寶此如列彝鼎室況有照耀來羣公光采並燦琳琅
筆

古兩頭纖纖詩

兩頭纖纖光萬丈半白半黑弦月上膈膈膊膊莫蟬響磊磊
落落疎窗晃

兩頭纖纖河影衝半白半黑弦月中膈膈膊膊樹吟風磊磊
落落杯酒空

兩頭纖纖淡雲飛半白半黑弦月西膈膈膊膊驚鴉棲磊磊
落落珠露齊

觀唐開元紀泰山銘用厲樊榭觀吳耕民所藏泰山摩
崖碑拓本同繪卣作元韻

兼旬苦雨臥高軒剝啄忽有人叩門手持唐碑摩泰岱展視

朗若日觀墩碑廣丈四高更倍響拓想見蒼崖捫稽首明皇
舉封禪築壇鑿礎非煩冤王者事天配藝祖百神從饗環精
魂不祈仙靈祈民福冊文虔告鐫璵璠大禮遠布突厥震遣
使扈行不敢喧錦雲色別馬數萬累年休養蕃息存登降況
有白驪異足令遠服誇中原禮成作文垂萬古摩勒那恤工
力煩神孫嗣統紹先烈前有乾封後開元鴻文千字神鼎扛
鐵筆萬畫蒼虬屯五松偃蓋秦樹陋三神拱揖靈風驚七十
二君久荒邈云亭往迹亦有根燕公定儀甯戾古但顯王業
中外尊紀錄永無顛踣慮蒼精呵護神龍蹲今日但賞文字
古天寶後事安足論東軒主人招羣客聚讀一洗塵眼昏聯
貫讀畢命手錄握筆俄頃雲雷奔模糊缺蝕數十字紬繹不
使遺一言因文更放往牒漏史家翻恐載籍繁錄本相要畧

韻語捷吟落筆輸湯伊亭孫愛白前人有作後塵繼健翮獨
媿凌霄鷗

題邱至山墨錄

東河先生擅詞翰文字光采雲霞鮮平生甘苦與墨共外物
不足分其專高齋櫝藏形式古爲珪爲璧殊方圓同岑持贈
悉著錄豈謂得魚能忘筌精神感通龍賓至物聚所好成因
緣邵羅方程名品備下逮諸家堪並傳編排先後慎登選百
十二家名貫穿墨本耐用壽於筆數挺定足支十年先生蓄
之何時用著書豈欲追彭籛四明南來京雒返紅梨匣滿奚
囊懸松林處晦夜半泣收拾精爽隨行鶴先生著述不負汝
壽以汝德元之元卽今藏弄未忍試惟靜惟默全其天有時
黑蛟起霖雨墨雲一噴萬井煙不才好古見恨晚對此異寶

神愕然題詞卷尾勉學步土黨黃山魂夢牽

題宗人漢槎所藏方艾山香筆畫蘭冊子

漳州織紙蕪湖鐵一炷名香又可熬

本朝藝事出愈奇畫法迥與前代別沈檀爲屑榆末和其細
視綫較寸多霜毫元玉俱退讓拂牋腕下煙雲過點痕著紙
成妙用濃淡全憑指輕重躁心鈍質兩無功靜助相看去豪
縱崇明李氏畫出羣曾言並擅惟方君不浮山水已妙絕艾
山此冊符昔聞蘭花高潔耽幽谷顏色豈宜婉清淑以香畫
出王者香縱使香銷自芳馥吾宗漢槎兼眾長工書善射琴
高張偶遇寸技便稱賞題詩祇恐汗鑿藏

雲磨將軍李秀殘碑歌

碑爲石礎二皆圓徑尺二寸弱
字可辨認者一才二十字一得

八十七字合模糊字計之每礎約百二十字別有石
刻康熙三十一年順天府丞石門吳涵所撰記詳述

二礎顛末云是唐雲麾將軍李秀碑北海太守李邕
書邕書雲麾將軍碑有二此在良鄉者乃李秀碑與
在蒲城之李思訓碑蓋同姓同官而異名也春明夢
餘錄稱范陽李秀唐明皇時以功拜雲麾將軍左豹
韜衛翊府中郎將封遼西郡開國公卒於開元四年
葬范陽福祿鄉碑刻於天寶元年此語當是碑中原
文今碑已殘闕據碑中所有字成句可讀者如式表
先公之墓其詞曰則為墓表可知曰遼水渺瀰則在
范陽無疑曰懿文莊武廣孝移忠利倍往昔功省今
茲是其功業可畧見也曰賢和淑慎靜恭貞白此必
稱其所配之德曰國家方築壇拜將考元宗初年契
丹突厥皆興戎事而李秀既為范陽人則其所効武
功或卽鄉土所近築壇拜將當指薛訥伐契丹之事
碑析為六礎度今拓本每礎圍徑尺二寸以方廣計
之則是碑高僅四尺餘博不及三尺也礎由良鄉輦
致宛平縣署又移入京兆少尹署遂為王京兆推儉
攜四礎之大梁今雲麾壠墓過良鄉者渺不知其處
而片碣留遺賴此二礎得與信國祠堂永垂不朽戊
戎吾友陳萬青遠山萬全梅垞昆弟旅寓京師二君
子皆吳公鄉里乃得拓本與其同邑數友賦詩紀事
表懋成軸出以示余因手摹而敘論
之復用昌黎石鼓詩韻作歌綴於末

語溪詞客性嗜古銷寒伯仲同聲歌詩題斷碣辨摹搨碑字

剝蝕云如何開元初政命薛訥北與契丹興干戈范陽縣屬
涿郡望壯士氣未歸銷磨粵有國族厥名秀陰符韜畧胸中
羅雲麾秩列三品從功烈身後碑巍峩良鄉福祿墓何處鬱
蔥但眺西山阿北海撰書不易得非其人者遭斥訶此碑名
重等岳麓緯畧所紀詞無訛摧殘難讀十亾九眞書亦類古
籀蝌何年學博琢六礎形圓鼓肖逢逢鼉得非臨平表奇瑞
欲扣何處尋桐柯星移物換經轉徙車轂來往如交梭古墨
齋頭位置久自公退食娛委蛇大梁載四獨留二荒庭晦夜
明霜娥六丁守護閱年載淒風苦雨悲滂沱延陵少尹獲狂
喜如寶珠玉驚隋和瓊椎楮墨一時用不與瓦礫稱同科二
石分明百七字餘不可辨模胡多移來嵌壁信國廟異陳倉
載須明駝後先唐宋兩將相事業飄忽浮雲過要惟大節不

磨滅留與志士資切磋懿文壯武忠本孝貞石照曜遼水波
築壇拜將擇參佐能用趙共推廉頗蒲城建碑偶同姓名乃
思訓知非他校刊碑板貴證實毋涉疑似相媿嬰周宣石鼓
徙太學生徒朔望來摩挲二礎剝缺差與埒韓蘇不遇誰吟
哦陳家兄弟擅風雅換書不惜山陰鷺況邕遺刻傳世少珍
若商頌存猗那珪分幾時璧重合石亦離析遭轍軻飢驅如
我更襪襪歸夢涉江先涉河碑文摹寫置行篋好事幸此非
蹉跎

妝域歌 并序

余昔見樊榭山房手稿曾有妝域聯句詩謂是明神
宗宮人兒嬉之具後於鮑氏知不足齋見有求售者
是雕漆所製上刻神宗年號今來浙上黃司馬小松

署齋出脉所藏乃琢象齒爲之其體圓徑二寸五分
面平而底稍隆起正中有臍六稜突起臍中卓一錐
長三分寸之一巖如燈心而不銳可使几上旋轉者
卽此錐也六稜周刻小楷字自右而左順讀曰甲寅
年七月二十四日造李得仁蓋萬曆四十二年也六
稜之外雲氣繚繞於僊山樓閣琪花瑤艸之間下有
二鹿牝牡相倚文顯而不深其正面則樓館山樹人
物皆鏤空飛動窪處大小二艇酒罇舟子相待老羽
衣翩然攜琴童子繼至主人謂宜作詩紀之遂爲此
歌時癸丑中秋後十日

日月雙跳似丸轉老大頭顱堆雪鬮書窗瞥見兒嬉物少小
情懷忽追緬物名妝域始前明神宗晚歲事遊晏深宮晝闕

許傳瓌

字公九天台人

送友人之杭

湖山春色自芳妍况值

蠻輿賁九天柳拂霓旌光裊裊花迎鶴葢影翩翩鶯聲欲雜
笙歌轉漁唱遙同簫管闌身在春臺熙樂境新詩定滿六橋
邊

徐士敷

字息廬西安人

偕乾敏上人游大乘寺

近喜游蹤健隨師過大乘鳥嘯深塢寂雨霽遠峯澄泉活沿
松榭簷高引荔藤山寮談興劇珍重有傳燈

林文朗

字靜齋樂清諸生著靜齋吟草集陶纂草

彭啟豐序畧余東嘉枝士畢將按赤城道宿樂清芙蓉
村有林生文朗者沃顏皓髮自稱雁蕩主人挾集陶纂

許傳瑛徐敷林文朝

諸詩見示贈以二絕曰芙蓉山下隱人居藝圃雲鋤自
晏如笑指雁山名蹟好每攜筇杖曳籃輿初逢絳縣數
流年早卸青衫謝客緣得句不
論工與拙和陶真趣總悠然

勸農

種豆南山下良苗亦懷新四時自成歲一日難再晨促席延
故老解顏勸農人所營非所務憂道不憂貧

暮冬

方宅十餘畝淒淒歲暮風南窗罕悴物冬嶺秀孤松飲酒不
得足賦詩頗能工養真衡茅下何必升華嵩

吳

錦字充甫號柳村齋子錢塘人乾隆己酉拔貢

杭郡詩續輯柳村幼慧目下數行隨父讀書畫皆承
家法大興朱文正公見之激賞稱其獨擅湖山之秀

庚戌秋九月二十日同人法源寺看菊分韻得樂字

城闌淡斜曛秋陰互林薄即景展重陽槭槭亂飛擗翩然舊

雨來爲訂尋芳約入門悄無人經臺下寒鵲清韻聽茶鐺妙
香淨禪閣閒穿小圃畦叢菊秀籬落冷蕊淡於人疏枝瘦若
鶴對花自忘言幽香逾落漠所遇素心同采采遙情託西山
向冬淨夕嵐翠臨郭人海遠車塵暫學淵明樂

李

泉

字秋水海鹽人乾隆己酉拔貢
官昌化教諭著廉讓居詩文鈔

家傳略秋水在昌化修志乘務詳核遇
歲饑勸捐平糶歸時僅攜石印十餘方

七十自壽

嬾散人因號謫仙平生文字結前緣未曾一擲誇劉毅不析
秋毫薄計然老去焚香翻梵夾閒來燒燭檢芸編莫言虛度
光陰速七十年過百卅年

胡昌基

字星祿號雲佇平湖人乾隆
己酉副貢著石瀨山房詩集

縣志昌基博綜經史尤工詩文揀選政數十年門下多
知名士嘗輯嘉郡康熙後百餘年詩以續沈季友樵李

詩繫遺聞軼事綴述頗多後盲於目子金題金勝種成
之竭二十餘年之心力博采旁搜手定三十九卷凡有
關風教者咸臚列焉

泉南十柳田家圖

占得幽居柳一彎門前垂柳綠陰環晚潮過後桔槔靜坐聽
蟬聲出樹間

白板雙扉黃石牆場開碌碡午風涼故人有約來相訪家在

珠溪第幾莊

吳振麟字兆岐號改園歸安人乾隆己酉

姚學塽跋貢官分水教諭著醉盤詩鈔
北不得數見君既沒諸子能讀父書為名諸生東井介

平先後舉
京兆試

重修表忠觀紀事

羣雄覬唐鼎神州迭簸蕩真人著黃袍四征大懲創西蜀洎

南漢恃險輒爭抗桓桓吳越王東南作保障幅員袤千里國
富兵強壯勁弩射潮迴江海失奔放假令力負嶠閩位足分
王惟王識天命勿敢逞驕亢手獻十四州一一封庫藏朝邸
營汴梁篚筐道相望遂令五季亂此邦獨無恙歌舞衢巷閒
父老情安暢惠固貽厥民忠更効於上所當示表揚以爲有
位勗胡然百年中墳廟生哀愴建議始築祠言報恐未當
聖世廣勸忠異代無遺忘爰

命守土司崇祠肅供養耀日棟輝煌排雲門閎闔

寶墨燦金題褒獎邀殊貺大哉

錫予恩推暨浩無量視彼鐵券賜無乃匹夫諒渺渺明聖湖
觀門屹相向瞻拜謁英姿錦衣整儀仗潮聲江上來颯颯神

旗颺

宿遷道中

晚風吹不已四野澹煙收
回首見新月寒山一片秋
孤城遙帶樹積水靜環樓
隔岸聞人語林深燈火幽

將出都門留別諸同好

去國亡聊住卻難兩年蹤跡溷長安
未能免俗禪猶曬無以爲家缺屢彈
河上筑聲流水急鏡中鬢影曉霜寒
三椽老屋茗溪曲歸計商量託釣竿

都門楊柳綠陰稠行色蕭條賸蒯緱
破帽疲驢山外驛亂蟬落日水邊樓
飛騰路阻青雲志屬望情添白髮愁
不盡回頭悽惻處金臺百尺峙清秋

卽目

一帶蘆花叢白鷺孤飛去
時聞漁篴聲不見停舟處

孫

蔚字守莖號逸雲鄞人乾隆己酉拔貢

泊舟方橋

日斜潮已落停棹且閒游野店春巢燕江船晚渡牛酒帘題
竹葉樵斧鑿槐瘤橋斷千人築何年跨碧流

時修方橋

閒行

曉飯無他事閒行破石苔霜寒木葉落天遠雁聲來古塙高
難隱新祠靜不開鄰園饒野意牆角一枝梅

桃花行

小舟暖泛琉璃波夾岸掩映桃花多桃花照水生錦浪隔浦
隱隱聞漁歌風光疑入武陵路淡淡著煙濃帶露人家雞犬
出林中短篷斜向橫塘渡渡頭幾樹迎風開妖韶倩女臨水
隈花光人面不相亞竹籬茅舍嘗低徊回頭夕陽下西嶺輕

霞豔入桃花影桃花四照更增妍春山一幅仙源景

盛

本

字倫先號小培慈谿人乾隆己酉拔貢官福建閩縣知縣

籍上詩輯倫先仕閩極著政績工書法至今遺墨流傳人爭寶之

錢武肅王鐵券歌

渭濱夜半流光瞥漁人舉網得古鐵細尋銘字瘦蛟蟠淨剔
苔痕繡紋揭乾甯歲月弁券端拉董摧楊褒大烈誓言鄭重
怒九死帶礪山河永不絕是誰勒此旌殊功錢王當日稱英
傑鞭梢指定十四州石鏡晃旒非草竊疊雪樓前駭浪回功
臣堂上豐碑兀三節還鄉挂錦衣豐沛大風歌未歇已看玉
冊錫三王更羨金甌完兩浙摩挲往迹四百年故物流傳未
斷缺丹書金字逮雲仍猶識王家舊閱閱君不見蛇鄉虎落
亦稱尊東府柘袍終覆沒江南眼見死牽機楚漢同時亦灰

滅太史尙父稱勳臣始信保世在忠節試將此券閱興亡從
古降王誰與匹

鄧嗣宗

字慈鍾象山人乾隆己酉拔貢著晚翠軒詩文集

縣志嗣宗嗜學精于史漢尤工古文善持議平時恤貧濟急克紹祖風與從弟亢宗相友愛嘗讀書石屋庵博覽子史亢宗著詩經集解多所研訂

題心溪十兄蓬萊山圖用鄉先輩俞櫟庵侍郎煉丹山

夜雨詩韻

家住蓬萊清景遲仙音斷續答松扉晨聽樵牧穿雲去暮接
耕漁帶月歸旅客應懷紅樹晚居人還憶綠蘿肥知君負米
江天遠不盡吟情寄翠微

吳啟焯

字純之上虞人乾隆己酉拔貢官壽昌教諭

校官詩錄蘊泄富於腹笥詩律雅近唐音錢小垌觀察以涓陽爲入室弟子淵源實有由來惜後嗣不免式微

兩折曾汗賣淥

卷十五

鄧嗣宗

吳啟焯

三

矣

送錢甥西來駭選拔北上

北望水迢迢行人折柳條杏花寒食路春雨廣陵潮帆影隨
雲合鄉山入夢遙渭城歌未闕魂已黯然銷

甥舅兼師弟情同骨肉親離亭此分手別淚共霑巾賤子無
他贈長言爲爾陳京華冠蓋地白眼莫看人

心迹化畦町文章奉典型張華堪作主劉向好傳經縞紵通
情素江山助性靈北行詩一卷計日發新硯

獻賦上燕臺天門詆蕩開新鶯刷毛羽芳樹選蓬萊自愛千
金體難量八斗才他年逢驛使遙寄隴頭梅

越王臺

臥龍山上雨淒淒憑說興亡弔會稽吳苑草生麋鹿走越臺

人去鷓鴣噓功名畢竟成薪膽得失何須論種蠹若把黃金鑄遺像勒銘應到苧蘿西

盧標字菊人東陽人乾隆己酉拔貢官甯海教諭著定谿詩集

廷家傳畧菊人善屬文工小楷書試日當軸問有先完卷者得三人菊人稟已就當軸者袖之去同舍生勸往謁卒不往時羣目為鐵人其在甯海校官任清苦自勵束脩外一無所受著有婺志粹十

四卷緜城漫鈔三卷攜懷一

題趙氏四賢母傳似村先生以其先人四賢母傳見示

集有五言側言詩一章默漢之首况乎有合輒效其體得八十字以識懿徽

趙氏有四母秉操特卓越勳力保厥子百計禦禱杌瘁苦譬

集蓼進退若負厯主者志挺挺侍者氣兀兀顧視恍守窹控

告誓赴闕憤甚併涕淚死弗挫俠骨永夜顛冥冥皎鑿牖戶

月此事例杵日義重可樹碣

馮尚書墓

去故址二里許其為大馮小馮則不可知矣

尚書亭館委山陂
荒冢行來更益悲
一代文章龍虎氣
千秋風雨鶴鴿思
洪臯泗水餘殘照
磴道松門亦斷碑
麥飯半盂今薦否
八仙臺畔鶴歸遲

王維孫

字祖蔭號荔村武義人乾隆己酉拔貢官青田教諭著荔村詩稿

徵官穀

月黑鷓鴣呼飛啄
人家屋昨夜縣符下
火速徵官穀惡吏如
虎虎擁狼踞坐上
頭索酒肉窮年辛苦奉
公家誅及雞豚猶不足
官府愈怒吏愈橫
寡婦哀哀舍南哭
夜深聲咽四壁愁
吏醉去眠倡家樓

吳鴻飛

字作賓遂安人乾隆己酉拔貢官昌化教諭

洪烈婦詩

并序

婦黃氏遂安西澗村人年十八歸祈田村農人洪尙
義洪歿誓守有諷其改志者仰藥死時年僅二十

朝望夫暮望夫朝朝暮暮魂夢孤魂夢孤長已矣誓與良人
共一死一死恐傷舅姑心奄奄餘生強顏起身未亡姑又亡
此時哀痛摧肝腸不入耳言汗我耳疾風勁草愈激昂鬼車
夜靜聲啾啾一杯酖毒甘于蜜言告我姑告我夫相見黃泉
我事畢嗚呼我事畢我心一貞柯藤葛詎能纏古井波瀾永
不盜蓬門弱質生氣存闔幽應俟凌雲筆

王惟球

字序東麗水人乾隆己酉拔貢官雲南鶴峯知州著洽香集珊瑚鈞詩鈔

府志惟球以拔貢授州判嘉慶初從征教匪有勞績署
黃梅知縣修建潘興口江隄四百餘丈護田數百頃民
勒石頌德補鶴峯州判鞫張有本獄得實咸以為神調
歸州判增置救生船拯濟無算改唐縣鎮判猾賊戴么
等賊累巨萬積年捕不得惟球立擒三十餘人
民建生祠祀之性好菊工書能篆刻著有印譜

浮邱伯釣臺

豸山之麓巨石巖如臺面削平坦邊不側上有一人把釣
臨溪隈羽衣芒履箕踞坐鯨鯢跋浪掀風來聞是道者浮邱
伯還丹曾脫塵凡胎回身拍手謝儔侶一聲長嘯滄波開蓬
瀛弱水三萬里乘興亦向溪灣迴偶拂臺石重理釣鷗浮鷺
宿無驚猜釣罷還騎赤鯉去遂令此臺靈氣萬古相依俚我
今訪勝登層嶼攀蘿披棘剔莓苔欲投長竿巨浪堆神鼉吼
立風喧厖身無仙骨猶徘徊搔首盼望仙雲頰但覺水聲激
激清月出嶺風花催

包穀吟

包穀亦黍屬種植滿陵阜山農無他糧惟藉此餬口幹高五
尺餘葉與蔗蘆偶節閒孕瓊津狀若筍初剖綠籜裹爲衣紫

絲纏若帚展或如鳳冠背明之國有鳳冠栗食者多力擊或如佛手名觀音

米結實臨深秋年年欣大有吾聞玉山禾樹大徒遮畝重思

朱似榴鄴都稻一名重思朱如石榴子味如菱此物是與否攜筐爭采摘歌響

答林藪鶴峯俗男女同耕凡遇落日銜遙山黃雲覆查篋無

肩挑惟以查篋背負以么姑好肩背奔趨忘路陡健兒莫逞強腰弓已卻

走歸家各磨礱一石米八斗精以供餅糜粗以釀雜酒包穀亦可

釀酒鶴峯土俗酒熟時男女雜坐歌唱為樂謂之飲雜酒既可娛嘉賓復可介眉壽貧民

得有此厥利亦良厚慎勿多費糜餘三猶待九吾願山中人

常飽此梁糗

魏精字讓泉雲和人乾隆己酉拔貢

縣志精早歲通經尤精春秋之學

擬謝靈運游赤石進帆海

未厭青春移氣候夏猶淑薄言赤石游遠樹暖巖谷息策方
 窮瘡鼓撓得縱目陽侯浩無涯颺母靜若伏蜃氣蒼穹浮鷗
 鳴沙渚逐尼父思乘桴齊桓擬轉軸徇祿未足榮適情自不
 惡好從羨門居予膺良所服

陳桂生

字雲柯一字薌谷兆崙孫錢塘人乾隆
 己酉優貢官至江蘇巡撫署兩江總督

杭郡詩三輯薌谷守句山太僕遺規不改清貧之素幼
 嗜學工八法貢成均後以教習得知縣所至有循吏聲
 清以律己勤以理民屢報最游擢荆宜施道由監司歷
 開府絕苞苴清名達

天聽

成廟賜冰燦家風額洵殊寵也

題青雨上人茶夢山房吟草

跌宕水雲真世界消除煙火小神仙名山合有詩僧在我欲

譚禪訪大顛

李錫齡

字商芝樂清人乾隆壬子順天舉
 人官義烏訓導著燕山吟草二卷

百菊溪侍御題余燕山吟草次韻奉酬

先生壯年已聞道鯉化鵬飛快獨早手提玉尺向并門吟徧
雲山詩格好柏臺霜冷夜啼烏朱顏半倚紅燈老倒篋驚聞
絕妙詞白雲蒼雪思懷抱愧余茅屋僅庇風清寒如郊瘦如
島祇應君苗逢士衡焚筆從今更焚草惆悵京華留滯身素
衣何日緇塵掃感君愛我有溫言春風一夕吹枯槁

沈文鏡

字朗夫
錢塘人

題畫

爽送微颺竹影娟近人明月小窗前湘紋琴薦鋪三尺一曲
冰絃操水仙

鄭

增字南皋
錢塘人

游光孝寺

香象莊嚴大地寬漢唐遺蹟幾憑闌蠻花遶逕虞翻宅清磬
含風智藥壇樹老菩提碑自古林空訶子井猶寒無靈鐵塔
徒雄峙歌舞岡前落照殘

金友白

字西庚號鼓村仁和人著怡雲詩鈔三卷

文丞相蟬腹硯歌

并序

乾隆初臨平漁者網得文信國綠端蟬腹硯於鼎湖
銘曰洮河石碧如血千年不死萇宏骨款識皋羽二
字其文云文山攀髯之明年疊山流寓臨安得此遺
硯焉

洮河石苔不蝕萇宏骨玉猶立文山之遺疊山得誰其銘者
睇髮生一十三字撐風霆琉璃花開蟋蟀鳴臣心惶恐君零
丁一塊內萬里航硯乎悔不偕行藏皋亭山下白雁至明因

寺前劉泐亡斯時尺土多非趙沈之於湖幸完好眼明及見
炎午文心堅不僉道清表堂堂正氣歌慨慷想見勤王檄會
草滄桑五百餘年矣蟬腹枵然飢不死沁以柴市兩行之血
淚捲起厓山百丈之海水青原琴相爾汝玉帶生共今古傳
向西臺痛哭時竹如意碎會摩拊銘詞不汗程鉅夫卜卦之
硯實非伍投湘自分同楚騷何幸時清遇漁父忠臣烈士與
遺民多少英靈此中聚

吳應和

原名甯字子安號榕園海鹽人著榕園吟稿十二卷

縣志應和敦行力學善詩古文詞並精音韻之學所選何大復菁華錄及浙西六家詩評論精當著有毛詩纂註榕園

詞韻

吳衡照曰榕園初學漢魏三唐既而浸淫北宋於詩家源流正變之故知之而能言之詩自出面目不蹈前明

臨摹

習氣

許淮祥曰榕園先生著有毛詩纂詁三國志音義騷雅
浙學內外編谷水校碑錄均未刊其已刊者有詞韻一
卷浙西六家
詩鈔六卷

崇善靈惠王墓 按墓碑王姓陳諱頊字行嵩會稽人東
晉官刺史使外城三年斷臂不屈節歸

梁大同二年追封崇善侯朱紹興六年顯靈拒金
兵加封靈惠王墓在阜亭山崇光寺西偏數十步

不可奪臣節能令外國驚生原依晉室死尙敵金兵異代岳
鵬舉前身蘇子卿衣冠古邱在常共佛燈明

旅懷

已耐經旬賦薄遊無心飲啄漫遲留暗窗雨久微生屐細草
春濃翠浥裘閒入黃昏刪舊稿醉傾白墮撥新愁卻憐枕上
家園近真境翻輸夢境遊

過家澹川南野草堂賦贈

脫身戎馬地一笑返煙蘿屋補秋林缺詩兼落葉多談兵心

慷慨載筆手編摩猶有出門意風塵奈老何

新秋夜同人小集分韻作

日夕暑風息開戶迎新涼草蟲逗秋氣月露團宵光索居念
朋好瑤華遠莫將及此共涼夜爲樂殊未央坐譚星河下胸
次生寒芒傾觴澆腹筍與古同醉鄉

同曹

宗載 蔣楷 祝德 與

暮遊審山集道院用韓文公山

石韻

吟筇拄影上翠微斜陽在背兼鳥飛林靜無風忽聞響枯藤
斷挂松鼠肥葛塢崔巍見宮殿暮入恰愛游人稀攀崖越嶺
易枵腹青精之飯飽我饑遙巒近墅暝一色琉璃光燦搖丹
扉石壇旛動影閃閃桂院花落香霏霏清鐘出樹碧煙破殘
月蒸霞紅暈圍下山呼侶巖壑應身浸涼露疑無衣吾儕淡

宕苦塵絆何異駮駢強受鞮他年福地種瑤草婚嫁已畢甯
思歸

晚步宿田家

回首遙嵐影漸迷行吟不覺板橋西雲隨飛鳥遠歸樹僧與
落花爭渡溪細雨泥人村路滑野航遲客柳陰低款留已感
勞炊黍欲傍雞棲聽曉噉

小除夕同人坐雨小集用查南廬今雨聯吟集倡和韻
不斷檐間滴瀝聲春來暗向雨中迎已拌今夜百分醉只望
新年十日晴貧歷歲除成小劫老耽詩癖總浮名衝泥吟客
能相過好盡餘杯到五更

朱履中

字玉堂海鹽貢生官福建

家傳畧公礪祿失怙家徒壁立遊幕八閩值臺匪滋事
兩渡重洋襄理軍務遇颶風經日本泊琉球逗留羊城

五嶺間領羅浮烟霧之奇回里後旋貢成均充
覺羅官學教習以知縣分發福建頗著循聲

擬古

行行重行行

行役自行役來歸安有期人生既遠別恩愛從茲離況復念
容色各在天一涯蟋蟀鳴牀下殘月照空帷晨起理妝鏡膏
沐將爲誰黃塵暗白日征夫無見時俯首長歎息奮飛奚能
爲爰託邊關雁寒暖聊寄知

涉江采芙蓉

湘沅多香草涉江采不已將以遺所思芳馨隔千里不見故
人還但見黃雲起離緒正依依雲影在江水

迴車駕言邁

中懷鮮定志世俗多紛歧驅車不休息草木榮復萎行行傷

遲暮凡物皆無時立身貴及早窮達安可期鄙夫患得失愚
人常惜資悲哉一抔土富貴夫何爲

施玉麟

字佩符孝豐增貢著友溪山人詩文集題畫詩錄

吳五鳳傳畧先生少儻朗多藝能有操行年四十不遇無意仕進善書畫詩不多作亦灑灑可誦妙解音律善鼓琴晚病足猶日作畫聞鼓琴作漁父歸去來今辭神氣甚暇酒酣耳熱縱談古今意甚得也

奉酬婦翁吳敬齋先生兼呈桑叟甫師

國家重經術明治資絲綸理法尙先輩士風求還淳樂正大
司徒書升稱得人得人豈不廣愚賤難自申是時延陵翁隱
居南湖津建塾佐元化談藝聯親賓纖阿一以出羣幽光璘
彬清真復雅正如火傳以薪星宿雖云遠今古黃河源哲人
雖云萎根本識所存克家得耆儒玉友映金昆卓哉稽古力
冠蓋盈一門伊予山中士終朝守兔園藉茲九里潤絕塵期

追奔青雲渺難致臨風慚騰軒

和敬齋先生鴛鴦湖權歌

菱歌十里小長蘆書畫船來興不孤除是富春黃子久由拳
能寫讀書圖

三輔清名尺五天叢臺從此賦歸田劃花定盃邯鄲瑟不上

南湖鴨菴船

先生方令邯鄲告歸

陶莊黃雀馬皋魚更好分湖足鱉胥釀得月波春酒熟燕梢
船裏著新書

翠色分來大滌樵篋簪綠上木蘭刀論詩許否攜黃九會景
亭西佐刺筒

趙文炤

字殿章上虞人

秋日登望江樓

山上層樓接太空憑高一眺豁雙瞳晴煙遠壓江光白落日
倒拖帆影紅千里雲巒供醉眼百年身世感飄蓬危闌倚徧
不歸去落木蕭蕭聽斷紅

楊國柱

字砥川東陽諸生著砥川遺稿

登金華山

金華山迴與天齊手挽煙蘿上石梯疊嶂當頭青漢近懸巖
到眼白雲低危嵐風急濤生樹古洞花繁錦滿堤叱石仙人
今在否尋蹤不覺夕陽西

吳

林

字芝麓遂昌貢官臨海教諭

縣志林少孤貧事母至孝躬耕以養暇輒讀書卒成通儒謹事寡嫂撫姪如子里有兩姓鬻妻力全之年八十餘

李家源回郡城

不覺層巒迴言歸病乍輕
頑雲遮客去流水逐人行
峽斷青霄闊邨遙古樹平
鄉思今夜減已至灑陽城

遣懷

身世愁何盡休教景物違
聽泉攜杖出采藥帶雲歸
座碧嵐光入齋空樹影稀
幽情誰共語長嘯對斜暉

兩浙輶軒續錄卷十五